

摘藻堂四庫全書薈要

史部

欽定四庫全書薈要

史部

後漢紀卷二十八

六至



欽定四庫全書薈要卷六千九百八十一

史部

後漢紀卷二十六

晉 袁宏 撰

孝獻皇帝紀一

初平元年春正月辛亥大赦天下侍中周毖城門校尉
伍瓊說董卓曰夫廢立事大非常人所及袁紹不達大
體恐懼出奔非有他志也今購之急勢必為變袁氏樹
恩四世門生故吏徧於天下若收豪傑以聚徒衆英雄
因之而起山東非公之有也不如赦之拜一郡守則紹

喜於免罪必無患矣卓以為然乃以紹為渤海太守癸丑卓殺弘農王卓使郎中令王儒進酖於王曰服藥可以辟惡王曰我無疾是欲殺我爾不肯強之於是王與唐姬及宮人飲藥王自歌曰天道易兮運何艱棄萬乘兮退守藩逆臣見迫兮命不延逝將去汝兮往幽玄唐姬起舞歌曰皇天崩兮后土頽身為帝王兮命天摧死生異路兮從此乖悼我煢獨兮心中哀因泣下坐者皆悲王謂唐姬曰卿故王者妃勢不為吏民妻矣自愛從

此與卿辭遂飲藥而死帝聞之降坐盡哀是時冀州刺史韓馥豫州刺史孔伋兖州刺史劉岱陳留太守張邈渤海太守袁紹東海太守喬瑁山陽太守袁遺河南太守王匡濟北相鮑信後將軍袁術議郎曹操等並興義兵將以誅卓衆各數萬人推紹為盟主紹自號車騎將軍操行奮武將軍長沙太守孫堅亦起兵誅卓比至南陽衆數萬人卓以堅為破虜將軍與其和弭堅討卓逾壯進屯陽人卓大怒遣胡軫呂布擊堅戰于建平堅大

破之卓以山東兵盛欲徙都關中召公卿議曰高祖都關中十一世後漢中興東都洛陽從光武至今復十二世案石苞室識宜復遷都長安百官無敢應者司徒楊彪曰遷都改制天下大事皆當因民之心隨時之宜昔盤庚五遷殷民胥怨故作三篇以曉諭之往者王莽篡逆變亂五常更始赤眉之變焚燒長安殘害百姓民人流亡百無一存光武受命更都洛陽此其宜也方今建立聖主光隆漢祚而無故捐宗廟宮殿棄先帝園陵百

姓驚愕不解此意必糜沸螳聚以致擾亂石苞室識妖邪之書豈可信用卓作色曰楊公欲沮國家計邪關東黃巾作亂所在賊起長安峻函險固國之重防又隴右取材木功夫不難杜陵南山下有孝武帝故陶作甄處一朝一夕可辦宮室官府盡何足言百姓小人何足與議若有前却以我大兵驅之豈得自在百寮皆失色太尉黃琬曰此大事楊公語得無可思乎司空荀爽曰相國豈樂遷都邪今山東兵起非可一日禁也而關西尚

靜故當遷之以圖秦漢之勢也堅爭不止禍必有所歸
吾不為也卓使有司奏免二公二月丁亥太尉黃琬司
徒楊彪策罷初卓用伍瓊周毖之議選天下名士馥等
既出皆舉兵圖卓卓以瓊毖賣已心怒之及議西遷瓊
毖固諫卓大怒曰君言當拔用善士卓從二君計不敢
違天下心諸君到官舉兵相圖卓何相負遂斬瓊毖彪
琬恐懼詣卓謝曰因小人戀舊非欲沮國事也請以不
及為受罪卓不勝當時之忿既殺瓊毖旋亦悔之故表

彪琬為光祿大夫卓以河南尹朱儁為太僕以為已副
儁不肯受因進曰國不宜遷必孤天下望成山東之釁
臣不見其可也有司曰召見君受拜而君拒之不問徙
事而君陳之何也儁曰副相國至重非臣所堪遷都非
計臣之所急也辭所不堪進其所急臣之宜也有司曰
遷都之事初無此計也就有未露何所受聞儁曰相國
董卓具為臣說有司不能屈於是朝之大臣及尚書郎
華歆等皆稱焉由是止不副卓卓愈恨之懼必為卓所

陷乃奔荊州光祿勳趙謙為太僕王允為司徒守尚書
令丁亥天子遷都長安卓留屯洛陽盡焚宮室徙民長
安壬辰白虹貫日三月己巳車駕至長安遭赤眉之亂
宮室焚盡唯有高廟京兆府舍遂就都焉戊午卓殺太
傅袁隗及其三子是時袁紹屯河內陳留太守張邈兗
州刺史劉岱東郡太守喬瑁山陽太守袁遺屯酸棗後
將軍袁術屯南陽豫州刺史韓馥大會酸棗將盟諸州
郡更相推讓莫有肯先者廣陵功曹臧洪升壇操血曰

漢室不幸王綱失統賊臣董卓乘釁縱害禍加至尊虐
流百姓大懼淪喪社稷翦覆四海兗州刺史劉岱豫州
刺史孔伷陳留太守張邈東郡太守喬瑁廣陵太守超
等糾合義兵並赴國難凡我同盟齊心戮力以致臣節
殞首喪元必無二致有渝此盟俾墜其命無克遺育皇
天后土祖宗明靈實皆鑒之洪辭氣慷慨涕泣橫下聞
其言者雖卒伍厮養莫不激揚卓兵強紹等莫敢先進
曹操曰舉義兵誅暴亂今衆已合諸君何疑後使董卓

聞山東兵起倚王室之尊據二周之險東向以臨天下
雖以無道行之猶足以為患今焚燒宮室劫遷天子海
內震動不知所歸此天亡之時也一戰而天下定矣不
可失也其引軍西戰於滎陽操兵大敗是時青州刺史
焦和亦起兵討卓務及諸將西行不為民人保障始濟
河黃巾已入其境青州殷實軍強和望寇奔北未嘗接
風塵交旗鼓也好卜筮信鬼神入見其人清談干霄出
觀其政賞罰漬亂州遂蕭條悉為邱墟頃之和病卒袁

紹使臧洪領青州撫和民衆盜賊奔走紹歎其能徙為東郡太守夏四月以大司馬劉虞為太傅尚書令王允奏曰太史王立說孝經六隱事令朝廷行之消却災邪有益聖躬詔曰聞王者當修德爾不聞孔子制孝經有此而却邪者也允固奏請曰立學深厚此聖人秘奧行之無損帝乃從之常以良日王允與王立入為帝誦孝經一章以丈二竹簞畫九宮其上隨日時而出入焉及允被害乃不復行也

袁宏曰神實聰明正直依人而行者也王者崇德殷薦
以為饗天地可謂至矣若夫六隱之事非聖人之道也
匹夫且猶不可而況帝王之命乎五月司空荀爽薨爽
字慈明朗陵令淑之子也年十二太尉杜喬師焉舉孝
廉賢良黨事禁錮隱於海上又南匿漢濱黨事解辟命
交至有道博士徵皆不就獻帝初董卓薦爽為平原相
未到官徵為光祿勳至府三日遷司空當是之時忠正
者慷慨而懷道者深嘿爽既解禍於董卓之朝又旬日

之間位極人臣君子以此譏之初爽兄弟八人號曰八龍爽最有儒雅稱兄子彧名重於世六月辛未光祿大夫种弗為司空卓發洛陽諸陵及大臣冢墓壞洛陽城中鍾簋鑄以為錢皆不成文更鑄五銖錢文章城郭不可把持於是貨輕而物貴穀一斛至數百萬遼東太守公孫度自號為平州牧立漢世祖廟單于羌渠既為國人所殺其子孫於扶羅應立國人立須卜為單于於扶羅詣闕訟會靈帝崩王室亂於扶羅將數千騎與白波

賊寇冀州界百姓皆高壁清野抄掠少有所得欲歸國
國人不受遂止河東

二年春正月辛丑大赦天下韓馥袁紹自稱大將軍遣
使推大司馬劉虞為帝不聽復勸虞承制封拜又不聽
然猶與紹連結二月丁丑相國董卓為太師夏四月卓
西入關卓使東中郎將董越屯澠池寧輯將軍段熲屯
華陰中郎將牛輔屯安邑其餘中郎校尉布在諸縣不
可勝紀以禦山東卓將至公卿以下迎之皆謁拜下卓

不為禮卓謂御史中丞皇甫嵩曰可以服未嵩曰安知
明公乃至於是卓曰鴻鵠固有遠志但鷙雀自不知爾
嵩曰昔與公俱為鴻鵠但今日復變為鳳皇爾卓乃大
笑曰卿早服何得不拜卓既為太師復欲稱尚父以問
左中郎將蔡邕邕曰昔武王受命太公為太師輔佐周
室以伐無道是以天下尊之稱為尚父今之功德誠為
巍巍宜須關東悉定車駕西還然後議之卓乃止於是
卓乘金華青蓋車時人號竿摩車言逼上也卓弟旻為

左將軍兄子璜為中軍校尉宗族內外並列朝廷呼召
三臺尚書以下皆詣卓府啓事然後得行築郿塢城與
長安城等積穀為三十年儲云事成雄據天下不成守
此足以畢老嘗行郿塢公卿已下祖道於橫門外誘北
降者三百餘人於坐中先披其舌或斬其手或鑿其眼
未死偃轉杯按之間會者戰慄失匕箸卓飲食自若初
卓飲衛尉張溫乃使人誣溫與袁術通謀笞殺之刑罰
殘酷愛憎相害冤死者數千人百姓嗷嗷道路歎息孫

堅自陽人入洛陽修復諸陵引軍還魯陽卓謂長史劉
艾曰關東諸將數敗矣無能為也唯孫堅小敢諸將軍
慎之堅昔西征其計策略與人同無故從諸袁兒終亦
死爾艾曰堅用兵不如李傕郭汜堅前與羌戰於美陽
殆死無能為卓曰堅時將烏合兵且戰有利鈍卿今論
關東大勢爾亦終無所至但殺二袁兒則天下自服矣
建武初立宗廟於洛陽元帝之於光武父之屬也故光
武上繼元帝又立親廟於洛陽祭祀而已不加名號光

武崩以中興之主更為起廟上尊號曰世祖廟以元帝
於光武為禰故雖非宗不毀也後遂為常明帝遺詔無
起寢廟藏主於世祖廟更衣更衣者帝王入廟之便殿
也孝章不敢違命以更衣有小別上尊號曰顯宗章帝
崩遺詔如先帝故事和帝上尊號曰肅宗後帝遵承皆
藏主於世祖廟積多無別是後顯宗但為陵寢之號和
帝崩上尊號曰穆宗殤帝崩鄧太后以尚嬰孩不列於
廟就陵寢祭之而已安帝殺大臣廢太子及崩無上祖

宗之奏以建武以來無毀者遂因陵號恭宗順帝崩上尊號曰孝宗沖質帝皆年少早崩依殤帝故事桓帝崩上尊號曰威宗靈帝崩而天下亂故未議祖宗之事於是有司奏議宗廟迭毀左中郎將蔡邕議曰漢承秦滅學之後宗廟之制不用周禮每帝即位輒立一廟不止於七昭穆不定宗廟迭毀孝元皇帝時丞相匡衡御史大夫貢禹始建斯議罷絀典禮孝文帝孝武帝孝宣帝皆功德茂盛為宗不毀初孝昭尊崇孝武廟稱世宗中

正大臣夏侯勝猶執異議不應為宗至孝宣皇帝議猶不定太僕王舜中壘校尉劉歆據經傳義定不可毀上從其議古人據正重慎不敢私其君父如此其至者也後遭王莽之亂光武皇帝受命中興廟稱世祖孝明皇帝政叅文宣廟稱顯宗孝章皇帝至孝蒸蒸仁恩博大廟稱肅宗比方前世得禮之宜自此已下政事多豐權稱臣下嗣帝殷勤各欲尊崇至親而臣下懦弱莫敢執正夏侯之議故遂憊濫無有防限今聖朝遵復古禮以

求厥中誠合事宜孝元皇帝世在第八光武皇帝世第九故元帝為考廟尊而奉之孝明因循亦不敢毀元帝今於廟九世非宗親盡宜毀比惠昭成哀平帝五年而再殷祭孝安孝桓孝昭孝和孝靈在穆四時常陳孝和以下穆宗恭宗威宗之號皆宜省去以遵先典殊異祖宗不可參並之義從之

袁宏曰光武之繫元帝可謂正矣夫君臣父子名教之本也然則名教之作何為者也蓋準天地之性求之自

然之理擬議以制其名因循以弘其教辯物成器以通天下之務者也是以高下莫尚於天地故貴賤擬斯以辯物尊卑莫大於父子故君臣象茲以成器天地無窮之道父子不易之體夫以無窮之天地不易之父子故尊卑永固而不逾名教大定而不亂置之六合充塞宇宙自今及古其名不去者也未有違失天地之性而可以序定人倫失乎自然之理而可以彰明治體者也末學庸淺不達名教之本牽於事用以惑自然之性見君

臣同於父子謂兄弟可以相傳為體謂友于齊於昭穆
違自然之本滅自然之性豈不哀哉夫天地靈長不能
無否泰之變父子自然不能無天絕之異故父子相承
正順之至也兄弟相及變異之極也變則求之於正異
則本之於順故雖經百世而高卑之位常崇涉變通而
昭穆之序不亂由斯而觀則君臣父子之道焉可忘哉
董卓問司徒王允曰欲得快司隸校尉誰可者允曰唯
有蓋京兆耳卓曰此人明智有餘然則不可假以雄職

也乃以勲為越騎校尉卓又畏其司戎復出為潁川太守頃之徵還京都公卿見卓皆拜謁勲獨長揖與卓爭論旁人皆失色而勲意氣自若初河南尹朱雋數為卓陳軍事卓曰我為將百戰百勝卿勿妄說且汙我刀鋸勲曰昔武丁之明猶求箴諫明公猶未及武丁也卓謝曰戲之爾勲強直而內懼於卓不得意疽發背卒時年五十一遺令勲無以報先帝勿受賻贈卓心雖憾勲然外示寬厚表賜東園祕器送之如禮勲字元固燉煌廣

至人舉孝廉為漢陽長史素與武都蘓正和有隙及正和為州從事劾武威太守倚權貴恣行貪橫涼州刺史梁鵠懼其貴戚欲殺正和以自解以訪勲或勸勲曰因此報仇勲曰不可謀事殺良非忠也乘危非仁也忠仁棄之人將不食我餘乃諫鵠曰夫縹食鷹鷂欲其驚也驚而烹之何用哉鵠從其言正和喜而求見勲勲曰吾為梁使君謀不為蘓正和也怨之如初黃巾之起故武威太守黃雋被徵失期鵠欲奏誅雋勲為言得免雋以

黃金二千斤與勲勲謂僞曰吾以子罪在八議故為子
言吾豈賣評哉終辭不受涼州刺史左昌因軍法斷盜
數千萬勲諫不聽乃怒勲使屯河陽欲因軍法罪之而
勲數有戰功詔書勞勉焉邊章之反圍昌逼急昌以檄
召勲勲初與從事辛曾孔常俱屯河陽曾常疑不肯應
檄勲怒曰昔莊賈後期穰苴奮鉞今之從事豈重於監
軍哉常懼乃從勲至冀親責數章等責以背叛之罪皆
曰左使君若早從君言以兵臨我得自分明今我罪已

重不可復降也皆泣涕而去會叛羌圍護羌校尉夏育
於畜官勲與州郡并兵救育至孤磐為羌所破勲被三
創前陣多死勲使人書木表曰使國家尸我於此羌滇
吾素為勲所厚乃以兵扞衆曰蓋長史清賢汝曹殺之
者為負天勲仰罵曰死反虜汝何知促殺我衆相視而
驚滇吾以馬與勲勲曰我欲死不去也衆曰金城購君
羊萬頭馬千匹欲與君為一勲咄咄曰我死不知也羌
遂囚勲勲辭氣不撓羌不敢害送還郡於是以勲為漢

陽太守民飢相食勲調穀廩之諸富室或匿不肯出勲
曰吾知罪矣乃自出家穀以率之郡中聞之不督而送
糴倉者二千餘斛賴勲之得存者千餘人六月丙戌京
師地震卓問蔡邕邕對曰地震陰盛大臣逾制之所致
也公乘青蓋車遠近以為非宜卓從之乘金華皂蓋車
秋七月司空种弗以地震策免癸卯光祿勲淳于嘉為
司空董卓既入關袁紹還軍延津使潁川荀諲說冀州
刺史韓馥曰公孫瓚乘勝來南而諸郡應之袁車騎引

軍東向此其意不可知竊為將軍危之馥曰為之奈何
諶曰公孫瓚提燕代之卒其鋒不可當袁氏一時之傑
必不為將軍下夫冀州天下之重資也若兩雄并力兵
交於城下危亡可立而待也夫袁氏將軍之舊也且已
同盟當今為將軍計者莫若舉州以讓袁氏袁氏得冀
州則瓚不與之爭必厚德將軍冀州入於親友是將軍
有讓賢之名而身安於泰山也願將軍勿疑馥素恒怯
因然其計馥長史耿武別駕閔純治中李歷騎都尉沮

授諫曰冀州雖鄙帶甲百萬穀支十年袁紹孤客窮軍
仰我鼻息譬如嬰兒在股掌之上絕其哺乳立可餓殺
奈何欲以冀州與之馥曰吾袁氏故吏且才不如本初
度德而讓古人所貴諸君獨何病焉乃遣子送邳綬以
讓紹紹既有冀州辟授為別駕從事紹謂授曰今賊臣
作變朝廷遷移孤歷世受寵欲竭命致死以復漢室然
桓公非夷吾不能成霸越王非范蠡無以存國今欲與
君戮力同心共安社稷授進曰將軍弱冠登朝播名海

內值廢立之際則忠義憤發卓雖凶暴弗能加兵昔相
如叱秦嬰哭莊方之將軍曷足以喻單騎出奔則卓
懷怖懼濟河而北則渤海稽首擁一郡之卒撮冀州之
衆威震河朔名重天下雖黃巾散亂黑山跋扈舉軍東
向則青州可定還討黑山則張燕可滅迴師北首則劉
虞必喪震脅戎狄則匈奴順從橫大河之北合四州之
地收英雄之用擁百萬之衆迎大駕於長安復宗廟於
洛邑號令天下以討未服以此爭鋒誰敢禦之比及數

年此功不難紹喜曰此孤之本心也即表授為奮武將軍使監護諸將袁紹以曹操為東郡太守初潁川人荀彧字文若舉孝廉為亢父令見天下將亂棄官歸家謂父老曰潁川四戰之地天下今有變常為兵衝密雖有固適可避小寇不足以捍大難宜亟去鄉里人多懷土不能從也韓馥遣騎迎焉會袁紹襲冀州待彧以上賓之禮彧弟諶及同郡辛評郭圖皆為紹任彧知紹不能有成也遂去紹歸曹操操見彧悅曰吾子房也以為司

馬時董卓兵強山東震恐或說操曰董卓暴虐已甚必
以亂終無能為也操善之丙寅太尉趙謙久病策罷辛
酉太常馬日磾為太尉公孫瓚以劉備為平原相十二
月錄從入關者功封侯賜爵各有差司徒王允為溫侯
食邑五千戶固讓不受尚書僕射士孫瑞說允曰天子
裂土班爵所以庸勲也與董卓太師並位俱封而獨勵高
節愚竊不安也允納其言乃受二千戶是歲長沙武陵
人有死者經月復活占曰至陰為陽下民為上將有自

微賤而起者也

後漢紀卷二十六

欽定四庫全書薈要卷六千九百八十二

史部

後漢紀卷二十七

晉 袁宏 撰

孝獻皇帝紀二

三年春正月丁丑大赦天下牛輔遣李傕郭汜張傽賈
詡出兵擊關東先向孫堅堅移屯梁東大為傽等所破
堅率千騎潰圍而去復相合戰於陽人大破傽軍傽遂
掠至陳留潁川荀彧鄉人多被殺掠帝思東歸使侍中
劉和出關詣其父太傅劉虞令將兵來迎道經南陽袁

術利虞為援質劉和不遣許以兵至俱西命劉和為書與虞虞得書遣數千騎詣術公孫瓚知術有異志不欲遣乃止虞虞不從瓚懼術聞而怨之亦遣其從弟越將千騎詣術以自結陰教術執和奪其兵由是虞瓚有隙初五原人呂布便弓馬膂力過人既殺丁原董卓信愛之誓為父子卓自以遇人無禮恐人謀已行止常以布自衛卓性剛褊忿不思難嘗以小失意拔手戟擲布布捷避之為卓致謝卓意亦解由是陰怨卓嘗使布守中

閤布與卓侍婢私通恐事發覺心自不安司徒王允以布州里壯健厚接納之布詣允陳卓幾見殺狀允與僕射士孫瑞密謀誅卓是以告布使為內應布曰奈如父子何允曰君自姓呂本非骨肉今憂死不暇何謂父子遂許之夏四月辛巳帝有疾旣瘳大會羣臣於未央殿卓置衛自其營至於掖門士孫瑞使騎都尉李順將呂布親兵十人偽著衛士服於掖門卓將出馬敗不進卓怪之欲還布勸之遂行入門衛士以戟刺之卓衣內有

鎧不入傷臂墜車大呼曰呂布何在對曰在此布曰有
詔趣兵斬之卓罵曰庸狗敢如是邪遂斬之卓母子皆
誅之尸於市司徒王允使人然火卓腹上臭乃埋之卓
字仲穎隴西臨洮人少好任俠嘗遊羌中盡與諸帥相
結後歸耕於野而豪帥有來從之者卓與俱還殺耕牛
相與宴樂諸豪帥感其意歸相斂得雜畜千餘頭以贈
之卓桓帝末以六郡良家子為羽林郎有才武膂力雙
帶兩鞬左右馳射稍以軍功遂至大將軍卓之死蔡邕

在允坐聞卓死有嘆惜之音允責邕曰國之大賊弑主
殘臣天地所不覆人臣所同疾君為王臣世受國恩國
主危難曾不倒戈卓受大誅而更嗟歎禮之所去刑之
所取使吏收付廷尉治罪邕謝允曰雖不忠猶識大義
古今安危耳所厭聞口所常說豈當以背國而向卓也
狂瞽之言謬出患入所謂邕也願黔首為刑以繼漢史
公卿惜邕才咸共諫允允曰昔武帝不殺司馬遷使作
謗書流於後世方今國祚中微戎馬在郊不可令佞臣

執筆在幼主左右後令吾徒受謗議遂殺邕邕字伯喈
陳留圉人也博學有雋才善屬文解音聲伎藝并術數
之事無不精綜初辟司徒府吏遷郎中著作東觀以直
言被刑初太尉董卓見邕甚重之舉高第補御史又轉
治書御史尚書三月之間周歷三臺左中郎將封高陽
侯於是以呂布為奮武將軍假節開府如三公初黃門
郎荀攸與議郎鄭泰何顥侍中种輯謀曰董卓無道甚
於桀紂天下怨之雖資強兵實一匹夫耳今直刺殺之

以謝百姓然後據殺函挾王命以號令天下桓文之舉也事垂就而發覺收顓攸繫獄顓憂懼自殺攸言笑飲食自若會卓死得免棄官歸鄉里兗州刺史劉岱為黃巾所殺東郡刺史曹操為兗州牧擊黃巾破之降者三十餘萬人五月丁未大赦天下征西將軍皇甫嵩為車騎將軍董卓既死牛輔為其麾下所殺李傕等還以輔死衆無所倚仗欲各散歸既無赦書而聞長安中欲盡誅涼州人憂恐不知所為賈詡曰聞長安中議欲盡殺

涼州人而諸君棄衆單行即一亭長能束君矣不如率衆而西所在收兵以攻長安為董公報仇幸而事濟奉國家以正天下若不濟走未晚也衆以為然遂將其衆而西所在收兵攻至長安衆十餘萬卓故部將樊稠等合兵圍長安劉表與袁紹連和袁術怒召孫堅攻表戰於新野表退屯襄陽堅悉衆圍之表將黃祖自江夏來救表堅逆擊破祖乘勝將輕騎追之為祖伏兵所殺堅子策權皆隨袁術六月戊午長安城陷呂布與戰不勝

將數百騎奔冀州催等入城內殺太常种弗太僕魯歆
大鴻臚周奐城門校尉崔烈越騎校尉王順死者數十
人司徒王允挾乘輿上宣平城門允謂催等曰臣無作
威作福而乃放兵縱橫欲何為乎催曰董卓忠於陛下
而無辜為呂布所殺欲為卓報布不敢為逆爾請事竟
詣廷尉受罪已未大赦天下拜李催為揚武將軍郭汜
為揚烈將軍樊稠等皆為中郎將甲子李催殺故太尉
黃琬司徒王允及其妻子衆庶為之流涕莫敢收允故

吏京兆趙戩葬允上以允為忠封其孫異為安樂侯允
字子師太原祁人容儀雅重非禮不動郭林宗稱允曰
宰相才也與之友善仕為郡主簿太守劉偉受宦者趙
津請託召中都路拂為五官掾允以拂狡猾不良封還
偉教至於四五坐鞭杖數十終不屈撓拂由是廢棄而
允名震遠近拂富於財賓客數百深怨允常欲害之允
從者不過數人每與拂遇允常坐車中按劒叱之拂輒
不敢當辟司徒府稍遷豫州刺史黃巾賊別黨起於豫

州允擊大破之於是賊中得中常侍張讓書允具以聞
靈帝帝深切責讓讓辭謝僅而得免讓由是怨允譖之
於靈帝帝詔徵允治罪道遇赦還官後百餘日復見徵太
尉楊賜與允書曰若以張讓事百日再徵宜深思之允
故吏流涕進藥允棄而不飲會大將軍何進請允得減
死一等遂變名姓隱遁山藪後何進表允為從事中郎
遷河南尹太僕及在公輔值國家禍亂允外相彌縫內
謀王室甚有大臣之度自天子及國中皆倚允卓亦雅

信焉卓旣死與士孫瑞議赦卓部曲旣而疑曰部曲從其主耳今若名之惡逆而赦之恐適使深自疑非所以安之也乃止或說允曰卓部曲素憚袁氏而畏關東若一旦解兵開關必人人自危不如使皇甫嵩領其衆因使屯陝以安之徐與關東通謀以觀其變允曰不然關東舉義兵者皆吾徒也今若距險屯守陝雖安涼州人而疑關東之心也呂布將奔謂允曰公可去矣允曰安國家吾之上願也若其不獲則殺身以奉朝廷幼主恃

我而已臨險難苟免吾不為也努力謝關東諸公當以
國家為念黃琬字子琰太尉瓊之孫也為五官中郎將
所選舉皆貧約守志者諸權富郎共疾之構琬以為黨
遂免官禁錮幾將二十年司空楊賜深敬重之上書薦
琬有撥亂之才由是徵拜議郎權為青州刺史遷侍中
尚書中平末涼州叛大將軍出征軍調不足富殖之徒
多以財為官者或起家為州郡琬由是奏太尉樊陵司
徒許相皆竊位懷祿苟進無耻終無匡救之益必有覆

公折足之患宜皆罷遣以清治路軍費雖急禮義廉耻國之大本也苟非其選飛隼在墉為國生事此猶負石救溺不可不察頃之遷右扶風歷九卿徵為豫州牧值黃巾陸梁民物凋弊延納豪俊整勒戎馬征討羣賊威聲甚震是時上遣下軍校尉鮑鴻征葛陂賊鴻因軍徵發欲盜官物賊過千萬琬乃糾奏其姦論鴻如法琬既名臣又與王允同謀故及於難宦兵之入長安太常种弗曰為國大臣不能禁暴禦侮使白刃向宮去將安之

遂戰而死弗字穎伯司徒暲之子也弗子邵為使者嘗
迂於卓左遷涼州刺史徵為九卿辭曰我昔盡忠於國
為邪臣所妬父以身殉國為賊所害夫為臣子不能除
殘去逆何面目復見明主哉三輔之臣聞之莫不感慟
焉初南陽何顓河內鄭泰好為奇畫顓逮郭林宗與之
遊學及黨事起顓以被禁錮乃變姓名亡匿汝南所至
皆結豪傑名顯荆豫之間靈帝末君子多遇禍難顓歲
中率常再三私入洛陽為人解釋患難泰知天下將亂

陰交結豪傑家富於財有田四百頃而食常不足名聞山東王室西遷泰以尚書郎從入關是時京師饑乏士人各各不得保其命而泰日與賓客高會作倡樂仰泰全濟者甚衆長安既亂南奔袁術術以泰為揚州刺史未至而卒丙子前將軍趙謙為司徒尚書令朱儁之出奔也與孫堅俱入洛陽既而屯於中年李傕等既破長安懼山東之圖已而畏儁之名僱用賈詡計使人徵儁軍吏皆不欲應儁曰以君召臣義不俟駕况天子詔乎

且備汜小豎樊稠庸兒無他遠畧又勢均力敵內難必
作吾乘其弊事可圖也遂就徵為太僕秋七月李傕使
樊稠至郿葬董卓大風暴雨流水入墓漂其棺槨庚子
太尉馬日磾為太傅錄尚書事八月辛未車騎將軍皇
甫嵩為太尉使太傅馬日磾太僕趙岐持節鎮關東初
孫堅殺南陽太守張咨袁術得據其郡南陽戶口數百
萬而術奢淫肆欲徵發無度百姓苦之既而與紹有隙
又與劉表不平引軍入陳留曹操袁紹會擊術大破之

術將餘衆奔九江殺揚州刺史陳溫領其州李傕等欲
術為援因令日磾即拜術為左將軍封陽翟侯假節日
磾趙岐俱在壽春岐守志不撓術憚之日磾頗有求於
術術侵侮之從日磾借節視之因奪不還日磾欲去術
又不遣病其所守不及趙岐嘔血而死九月揚武將軍
李傕為車騎將軍封池陽侯領司隸校尉假節郭汜為
後將軍封郿陽侯樊稠為右將軍封萬年侯傕汜稠擅
朝政張濟為驃騎將軍平陽侯屯弘農初董卓入關說

韓遂馬騰共圖山東遂騰見天下方亂亦欲起兵倚卓
卓死催汜攻破京師遂騰將兵救天子是月遂屯郿騰
屯鄠司徒趙謙以久病罷甲申司空淳于嘉為司徒光
祿大夫楊彪為司空錄尚書事冬十月荊州刺史劉表
遣使貢獻以表為荊州牧初弘農王唐姬者故會稽太
守唐瑁女也王薨人欲嫁之不從及關中破為李傕所
畧不敢自說也催欲妻之唐姬不聽尚書賈詡聞之以
為宜加爵號於是迎置於園拜為弘農王妃李傕舉博

士李儒為侍中詔曰儒前為弘農王郎中令迫殺我兄
誠宜加罪辭曰董卓所為非儒本意不可罰無辜也丁
卯日有重暈太尉皇甫嵩以災異策免光祿大夫周忠
為太尉錄尚書事嵩字義直規之兄子也善用兵為將
飲食舍止必先將士然後至己乃安焉兵曹有所受賂
者嵩曰公素廉必用乏也出錢賜之吏慚即自殺董卓
之入徵嵩為城門校尉嵩長史梁衍說嵩曰漢室微弱
宦豎亂朝卓既誅之不能盡忠奉主而廢立縱意今徵

將軍禍大則憂危禍小則困辱卓在洛陽天子來西以將軍之衆奉迎天子發命海內袁氏逼其東將軍逼其西則成禽矣嵩不從遂就徵有司承旨奏嵩下吏將殺之嵩子堅壽與卓素善詣卓請卓免之華嶠曰臣父袁每言臣祖歆當時人以皇甫嵩為不伐故汝豫之戰歸功於朱儁張角之捷本之於盧植蓋功名者士之所宜重誠能不多天下莫之與爭則怨禍不深矣

四年春正月甲寅朔日有蝕之未晡八刻太史令王立奏

曰日晷過度無有變色於是朝臣皆賀帝密令尚書候
焉未晡一刻而蝕尚書賈誦奏立司候不明疑悞上下太
尉周忠職所典掌請皆治罪詔曰天道幽遠事驗難明
且災異應政而至雖探道知微焉能不失而欲歸咎史
官重益朕之不德不從於是避正殿寢兵不聽事五月
丁卯大赦天下徐州刺史陶謙遣使奉貢以謙為徐州牧
癸酉無雲而雷六月華山崩東海王子琬琅邪王弟邈
詣闕貢獻以琬為平原相邈為九江太守皆封列侯太

尉周忠以災異罷太僕朱儁為太尉錄尚書事已酉以平原相劉備為豫州牧是時新遷都宮人多無衣服秋七月帝欲發太府繒以作之李傕不欲曰宮中有衣胡為復作邪尚書郎吳碩素諂於傕乃言曰關東未賓用度不足近幸衣服乃陵轢同寮尚書梁紹劾奏碩以瓦器奉職天臺不思先公而務私家背奧媚竈苟諂大臣昔孔子誅少正卯以顯刑戮碩宜放肆以懲姦偽若久舍不黜必縱其邪惑傷害忠正為患不細帝以碩傕所

愛寢其奏是時帝使侍御史裴茂之詔獄原輕繫者三百餘人其中有善士為宦所枉者宦表之曰茂之擅出囚徒疑有姦故宜置于理詔曰災異數降陰雨為害使者銜命宣布恩澤原解輕微庶合天心欲解冤結而復罪之乎一切勿問七月甲午試耆儒三十餘人上第賜郎中次太子舍人下第者罷詔曰孔子歎學之不講不講則所識日忘矣今耆儒年餘六十離本土家餉不到當展四體以餬口腹幼童始學老妻農野朕甚愍焉其

不在第者為太子舍人冬十月太學行禮車駕幸宣平
城門臨觀之賜博士以下各有差辛丑京師地震有星
孛于天市占曰民將徙天子移都其後上東遷之應也
司空楊彪以地震策罷丙午太常趙溫為司空錄尚書
事初公孫瓚與劉虞有隙虞懼其變遣兵襲之戒行人
曰無傷餘人殺一伯珪而已瓚放火燒虞營虞兵悉還
救火虞懼奔居庸欲召烏桓鮮卑以自救瓚引兵圍之
生執虞而歸是時朝廷遣使者殷訓增虞封邑督六州

事以瓚為前將軍封易侯瓚誣虞欲稱尊號脅訓誅之
於是虞故吏漁陽鮮于輔率其州人及三郡烏桓鮮卑
與瓚所置漁陽太守鄒丹戰於薊北大破之斬丹既而
持其衆奉王命帝嘉焉袁紹又遣其將麴義及虞子合
擊瓚瓚敗遂走還易先有童謡曰燕南垂趙北際中央
不合大如礪唯有此中可避世瓚以為易當之乃築京
固守積粟三百萬斛瓚曰昔謂天下事可指麾而定今
日視之非我所決不如伏兵力田食盡此穀足知天下

事矣初劉虞歎曰賊臣作亂朝廷播蕩四方俄然莫有
固志吾為宗室遺老不得自同於衆今欲奉使展效臣
節安得不辱之士乎衆咸曰田疇其人也疇字子泰右
北平無終人也好讀書善擊劒時年二十二虞乃備禮
請與相見大悅之遂署為從事與車騎將行疇曰今道
路險遠寇虜縱橫稱官奉使為衆所指今願以私行期
於得通而已虞從之疇乃選多少勇壯募從二十騎虞
自出祖而遣之疇出塞外傍北山直馳趣朔循問經遂

至長安致命詔拜騎都尉疇以天子方蒙塵不可荷佩
榮寵固辭不受朝廷甚義三府並辟皆不就得報馳還
未至虞已為公孫瓚所殺疇至謁祭虞墓陳發章表哭
泣而去瓚聞之大怒購求獲疇謂曰汝何故自哭劉虞
墓而不送章報我乎疇曰漢報所言於將軍未美恐非
所樂聞故不進也且將軍方舉大事以求所欲既滅無
罪之君又讎守義之臣誠能行此則燕之士將蹈東海
而死豈有思從將軍者乎瓚壯其對釋而不誅拘之軍

下禁其故人莫得與之通或說瓚曰田疇義士君不能
禮而拘囚之恐失衆心瓚乃遣疇疇北歸率舉宗族他
附從者亦數百人掃地而盟曰君仇不報不可以立世
遂入徐無山營深險平曠而居躬耕以養父母百姓歸
之數年間五千餘家疇謂其父老曰諸君不以疇不肖
遠來相就衆成都邑而莫相統一恐非久安之道願推
擇賢良長者以為之主皆曰善僉共推疇疇曰今來在
此苟存而已將圖大事復讐雪耻竊恐未得其志而輕

薄之徒自相侵侮愉快一時無深計遠慮疇有愚計與君行之可乎皆曰可乃為約束相殺傷把盜爭訟之法法重至死其次抵罪二十餘條又制為婚姻嫁娶之禮興學校講授之業班行其衆衆皆便之道不拾遺北邊翕然服其威信烏桓鮮卑並各遣屬通好疇悉撫納令不得為寇袁紹數遣使命又即授將軍印綬皆距而不當之十二月辛丑司空趙溫以地震罷乙巳衛尉張喜為司空錄尚書事分漢陽郡為永陽郡是歲袁術使孫

策略地江東軍及曲阿揚州刺史劉繇敗績將奔會稽
許邵曰會稽富策之所貪且窮在海陽不可往也不如
豫章西接荊州北連豫章若收合吏民遺貢獻焉與曹
兗州相聞雖有袁公路隔在其間其人豺狼不能久也
足下受王命孟德景升必相救濟繇從之邵字子將汝
南平輿人也少讀書雅好三史善與人論臧否之談所
題目皆如其言世稱郭詩之鑒焉廣陵徐球為汝南太
守請邵為功曹球亦名士解褐事之同郡陳仲舉名重

當時鄉里後進莫不造謁邵獨不詣蕃謂人曰長幼之序不可廢也許君欲廢之乎邵曰陳侯崖岸高峻百谷莫得而往遂不造焉嘗至潁川不詣陳仲弓或問其故邵曰此君之道廣廣則不周故不行也同郡袁季初公族豪俠賓客輻輳去濮陽令歸從車甚盛將入郡界歎曰吾輿服豈可令許子將見之乎謝遣賓客以單車歸家邵之見憚皆此類也司空楊彪辟不就舉方正公車徵不行或勸邵邵曰方今小人道長王室將亂吾欲避

地淮海以全老幼及天下亂邵至廣陵徐州刺史陶謙禮之甚厚邵曰陶恭祖外好聲名內非其真今徐州穀貴小人在側方厭賓客待吾雖厚其勢必薄乃渡江投劉繇其後謙捕諸寓士陳留史堅元陳郡相仲華逃竄江湖皆名士也邵與劉繇俱行終于豫章焉

興平元年春正月辛酉大赦天下甲子帝加元服二月戊寅有司奏立長秋詔曰皇妣宅兆未卜三年之戚禮不言吉朕雖不能終身思慕其何忍言後宮之選乎於

是太尉朱雋司徒淳于嘉司空張喜奏曰春秋之義母以子貴宜改葬皇妣追上尊號曰穆宗恭宗故事甲申改葬皇妣王氏號曰靈懷皇后后邯鄲人祖苞治尚書為五官中郎父章襲苞業居貧不仕有子二人男斌女曰榮榮則后也后以選入掖庭為貴人有寵妊身怖畏何后服藥欲除胎胎安不動又夢負日而行遂生帝何后惡之鴆殺后靈帝大怒欲廢何后諸黃門請僅而得止靈帝憫上早孤追思王后乃作令儀頌初上詔求斌

斌將妻子詣長安賜第宅田業遷執金吾封都亭侯丁亥車駕耕于藉田是時李傕等專亂馬騰等私求不獲騰怒以益州牧劉焉宗室大臣遣使招引欲共誅傕等焉遣子範將兵就騰岐州刺史种邵太常拂之子拂為傕所害中郎將杜稟與賈詡有隙並與騰合報其讐隙於是傕騰携貳上遣使者和之不從稟遂率衆來欲和傕騰既而復與騰合壬申騰遂勒兵屯平樂觀將圖長安傕使樊稠郭汜及兄子李利擊騰遂破之邵範等皆

死遂西走稠追之遂謂稠曰天地反覆未可知本所爭者非私怨王家事耳與足下州里雖小有違要當大同欲相與善語而不意後不可復乃交馬共語良久別去庚申赦騰夏四月以馬騰為安狄將軍遂為安羌將軍徐州牧陶謙北海相孔融謀迎天子還洛陽會曹操襲曹州而止陳留太守張邈反呂布為兗州牧郡縣皆應之唯甄城范陽東阿三縣不從邈使人告荀彧曰呂布將軍來助曹使君擊陶謙宜給其食衆皆疑或知邈為

亂即勒兵設備時操軍攻謙留守少而布督將大吏多
與邈謀其夜或誅謀叛者數十人衆乃定豫州刺史郭
貢率衆數萬人來至城下或言與呂布同謀衆甚懼貢
求見或或將往或曰君一州鎮也往必危不可或曰貢
邈分非素結今來速計必未定及其未定說之縱不為
用可使中立若先疑之彼將怒而成計貢見或無懼意
謂甄城未易攻也遂引兵去操引軍還攻呂布五月即
拜揚武將軍郭汜為後將軍更封美陽侯安集將軍樊

稠為右將軍開府如三公六月丙子分河西郡為雍州
丁丑京師地震戊寅又震乙酉晦日有蝕之避正殿寢
兵不聽事五日秋七月壬子太尉朱儁以災異策罷戊
午太常楊彪為太尉錄尚書事甲子即拜鎮南將軍楊
定為安西將軍開府如三公自四月不雨至于七月詔
使侍御史侯汶洗囚徒原輕繫上避正殿於是穀貴大
豆一斛至二十萬長安中人相食餓死甚衆帝遣侍御
史侯汶出太倉米豆為貧人作糜米豆各半大小各有

差餓死者甚衆帝疑廩賦不實勅侍中劉艾取米豆各五升燒火於御前作糜得二盆於是艾出問尚書米豆五升得糜二盆而民委頓何也朕甚愍之民不能自濟故部使者出米豆冀有益焉御史不加隱恤乃如是乎尚書以下詣省閣謝奏收侯汶考治實詔曰未忍致于理杖五十亟遣上親所廩人名於是悉得全濟八月馮翊羌寇屬縣後將軍郭汜右將軍樊稠等率衆破之斬首數萬級九月曹操還鄆城呂布屯山陽冬十二月司徒

淳于嘉久病罷衛尉趙溫為司徒錄尚書事

後漢紀卷二十七

欽定四庫全書薈要卷六千九百八十三

史部

後漢紀卷二十八

晉 袁宏 撰

孝獻皇帝紀三

二年春正月癸酉大赦天下即拜袁紹為後將軍使持節冀州牧封邴鄉侯沮授說紹曰公累世輔弼世濟忠義今朝廷播越宗廟毀壞觀諸州郡外託義兵內懷相擒未有存主卹民者也今且州域粗定宜迎大駕安宮鄴都挾天子而令諸侯畜士馬以討不庭誰能禦之紹

說將從之郭圖淳于瓊曰漢室凌遲為日久矣今欲興之不亦難乎且今英雄據有州郡動衆萬計所謂秦失其鹿先得者王今迎天子以自近動輒表聞從之則權輕違之則拒命非計之善也授曰今迎朝廷至義也又於時宜大計也若不早圖必有先之者權不失機功在速捷其熟圖之紹不能從是時以年不豐民食不足詔賈廐馬百餘匹御府大司農出雜繒二萬匹與馬直賜公卿已下及貧民不能自存者李傕曰我邸閣儲峙少

乃不承詔悉載置其營賈詡曰此乃上意不可拒也不
從李傕郭汜樊稠各自以有功爭權欲鬪者數矣賈詡
每以大體責之雖內不能善外相含容初樊稠擊馬騰
等李利戰不甚用力稠叱之曰人欲截汝父頭何敢如
此我不能斬卿邪利等怒共譖之於傕傕見稠勇而得
衆心亦忌之二月李傕殺右將軍樊稠撫軍中郎將李
象由是諸將皆有疑心傕數設酒請汜或留汜止宿汜
妻懼傕與汜婢妾而奪已愛思有以離間之會傕送饋

妻乃以豉為藥汜將食妻曰食從外來儻或有故遂摘藥示之曰一棲無兩雄我固疑將軍信李公也他日催復請汜大醉汜疑催藥之絞糞汁飲之乃解於是遂相疑治兵相攻矣上使侍中尚書和催汜不從乃謀迎天子幸其營夜有亡者告催三月丙寅催使兄子李暹將數千兵圍宮以車三乘迎天子太尉楊彪曰自古帝王無在人家者舉事當合天心諸君作此非是也暹曰將軍計定矣於是天子一乘貴人伏氏一乘黃門侍郎賈

詔左靈一乘其餘諸臣皆步司徒趙溫司空張喜聞有
急自其府出隨乘輿旣出兵入殿中掠宮人御物是日
天子幸催營又徙御府金帛乘輿器服置其營遂放火
燒宮殿官府居民悉盡天子復使公卿和催汜汜又留
太尉楊彪司空張喜尚書王隆光祿勳劉淵衛尉士孫
瑞太僕韓融廷尉宣璠大鴻臚榮邵大司農朱雋將作
大匠梁邵屯騎校尉姜宣等夏四月郭汜饗公卿議攻
李傕楊彪曰羣臣共闕一人劫天子一人質公卿此可

行乎汜怒欲办之中郎將楊密諫汜乃止朱雋素剛直
遂發病死雋字公偉會稽上虞人少好學為郡功曹太
守徐珪為州所誣奏郡吏謀賂宦官雋曰明府為州所
枉不思奮命而欲行賂以穢清政是有君無臣也今州
自有賊汙而求郡纖介抱罪誣人雋俱知之請詣京都
無以賂為也珪曰卿之智情我所知也今州奏已去恐
無及也雋曰操所作章疾馬兼追足以先州且尋郵推
之州書可得矣珪曰善雋即夜發輕騎數十人分伺州

書果得而鈔絕之雋得獨至京師上書告刺史罪章即下乃徵刺史珪事得解刺史家聞使刺客分遮道欲殺雋雋知乃從洛陽尉司馬珍自匿變服而去珪大悅雋由是顯名舉孝廉為尚書郎遷蘭陵令光和初交趾賊梁龍等攻郡縣以雋治蘭陵有名即拜交趾刺史雋上書求過本郡募兵天子許之得以便宜從事將家兵二千人并郡所調合五千人分兩道至州界斬蒼梧太守陳紹遣使喻以利害降者數萬人乃勒兵擊斬龍旬月

盡定封都亭侯賜黃金五十斤甲午立皇后伏氏后琅邪東武人也父完深沉有大度舉孝廉稍遷五官中郎將侍中以選尚陽安長公主主桓帝女也生五男一女長男德次雅次后次均次尊次朗后以選入掖庭為貴人完遷執金吾於是李傕召羌胡數千人先以御物繒綵與之許以宮人婦女欲令攻郭汜羌胡知非正不為盡力郭汜與傕中郎將張苞張寵等謀攻傕丙申兵交及帝殿前又貫傕左耳楊奉於外距汜汜兵退張苞張

寵因以所領兵詣汜是日僊復移乘輿幸北塢門内外
隔絕諸侍臣皆有飢色帝求米五斛牛骨五具以賜左
右僊曰御脯上飯何用米為乃與腐牛骨皆臭不可食
帝大怒欲責詰之侍中楊琦上封事曰僊邊鄙之人習
於夷風今又自知所犯悖逆常有怏怏之色欲轉車駕
幸黃白城以舒其憤臣願陛下宜恕忍之未可顯其罪
也上納之初僊屯黃白城故謀欲徙僊以司徒趙溫不
與已同乃內溫塢中溫聞僊欲移乘輿黃白城與僊書

曰公前託為董公報仇然實屠陷王城殺戮大臣天下不可家見而戶喻也今爭睚眦之隙以成千金之讐民在塗炭各不聊生曾不改悟遂成禍亂朝廷仍下明詔欲令和解詔命不行恩澤日損而復欲轉乘輿黃白城此老夫所不解也於易一過再為涉三而弗改滅其頂凶不如早共和解引軍還屯上安萬乘下全生民豈不幸甚僉大怒欲遣人害之其弟應溫故吏也諫之數日乃止帝聞溫與僉書問侍中當洽曰僉不知臧否溫言

大切可為寒心洽曰李應以解之矣上乃悅催信鬼神
晝夜祭祀為董卓設坐三牲祠之祠畢過問帝起居因
求入見催帶三刀執一刀侍中見催亦帶刀入侍值催
數犯之罪上面答之催出喜曰陛下賢主也催曰侍中
皆持刀欲圖我乎侍中曰軍中自爾國家之故事也催
乃安閏月己卯遣謁者僕射皇甫麗和催犯麗先詣犯
犯從命又詣催催不聽曰我有誅呂布之功輔助四年
三輔清淨國家所知也郭多盜馬虜耳何敢欲與吾等

邪必誅之君觀吾方略士衆足辦郭多不多又劫質公卿所為如是而君苟欲左右之邪汜一名多麗曰昔有窮后羿恃其善射不思患難以至於斃近者董公強將軍所知也內有三公以為主外有縱橫以為黨呂布受恩而反圖之斯須之間身首異處此有勇而無謀也今將軍身為上將抱鉞持節子孫親族荷國寵榮今汜質公卿而將軍脅之誰輕重乎張濟與郭多楊定有謀又為冠帶所附楊奉白波師耳猶知將軍所為非是將軍

雖寵之猶不輸力也。傕不從呵遣麗。麗曰：「傕不從詔，亂語不順侍中胡邈。」傕所薦也。謂麗曰：「李將軍於卿非常也。」又皇甫公為太尉將軍，力也是言。何謂乎？麗曰：「吾累世受恩，又常在帷幄，君辱臣死，就為李傕所殺，志無顧也。」上懼，傕聞麗言，勅麗令去。傕遣虎賁王昌呼麗欲殺之。昌諷麗令去，還曰：「臣追之不及。」辛巳，車騎將軍李傕為大司馬。是夏，陶謙病死。劉備在徐州，曹操欲襲之。荀彧曰：「昔高祖保關中，光武據河內，皆深根固本以制天。」

下進可以勝敵退可以堅守雖有困敗而終濟大業將
軍本以兗州首事平山東之難百姓歸心悅服且河濟
天下之要地也人雖殘壞猶易以自保是亦將軍之關
中河內也若不先定之根本將何寄乎今破李封薛簡
若兵東擊陳宮宮必不敢西顧乘其間而收熟麥約食
畜穀一舉而布可破也布破然後南結揚州兵討袁術
臨淮泗若捨布而東多留兵則不足用少留兵則民皆
保城不得樵採布乘虛寇暴民心益危雖甄城范衛可

全其餘非公之有是無兖州也若徐州不定將軍安所歸乎且陶謙雖死徐州未易忘彼懲往年之敗將愧而結親相為表裏今東方皆已收麥必堅壁清野以待將軍將軍攻之不拔掠之無所獲不出十日則十萬之衆未戰而自困也前討徐州威罰實行其子弟念父兄必人人自守而無降心就道破之尚不可有也事故有棄此取彼者以大易小可也以安易危可也權一時之勢不患本之不固可也今三者莫利願將軍熟慮之操乃

止復定兗州六月侍中楊琦黃門侍郎丁冲鍾繇尚書
左丞魯充尚書郎韓斌與催將楊奉軍吏楊帛謀共殺
催會催以他事誅帛奉將所領歸汜庚午鎮東將軍張
濟自陝至欲和催汜遷乘輿幸他縣使太官令狐篤綏
民校尉張裁宣喻十反汜催許和質其愛子催妻愛式
和計未定而羗胡數來闕省問曰天子在此中邪李將
軍許我宮人美女今皆何所在帝患之使侍中劉艾謂
宣義將軍賈詡曰卿前奉職公忠故仍升榮寵今羗胡

滿路宜思方畧詡乃召大帥飲食之許以封賞羗胡乃引去僉由此單弱於是尚書王復言和解之意計以士衆轉少從之不以男各女為質封為君食邑復以汜從弟濟從子繡僉從弟桓為質秋七月甲子車駕出宣平門汜兵數百人前曰此天子非也左右皆將戟欲交待中劉文前曰是天子也使參乘高舉帷諸兵何敢逼至尊邪汜兵乃却士衆皆稱萬歲夜到霸陵從者皆饑張濟賦給各有差僉出屯河陽丙寅以張濟為驃騎將軍

封平陽侯假節開府如三公郭汜為車騎將軍假節楊
定為後將軍封列侯董承為安集將軍追號乳母呂貴
為平氏君郭汜欲令車駕幸高陵公卿及濟以為宜幸
弘農大會議之不決詔尚書郭浦喻汜曰朕遭艱難越
在西都感惟宗廟靈爽何日不歎天下未定厥心不革
武夫宣威儒德合謀今得東移望遠若近視險如夷弘
農近郊廟勿有疑也汜不從上曰祖宗皆在洛陽靈懷
皇后宅兆立未遑謁也夢想東轅日夜以冀臨河誰謂

其廣望宋不謂其遠而汜復欲西乎遂終日不食浦曰
可且幸近縣八月甲辰車駕幸新豐張濟諷尚書徵河
西太守劉玄欲以所親人代之上曰玄在郡連年若有
治理迨遷之若無異効當有召罰何緣無故徵乎尚書
皆謝罪上既罪濟所諷也詔曰濟有拔車駕之功何故
無有表而私請邪一切勿問濟聞之免冠徒跣謝後將
軍楊定請侍中尹忠為長史詔曰侍中近侍就非其宜
必為關東所笑前在長安李傕專政今朕秉萬機豈可

復亂官爵邪時上年十五每事出於冒懷皆此類也丙子郭汜等令車駕幸郿侍中种輯城門校尉衆在汜營密告後將軍楊定安集將軍董承興義將軍楊奉令會新豐定等欲將乘輿還洛陽郭汜自知謀泄乃棄軍入南山是月曹操圍張超於雍邱超曰救我者唯臧洪乎衆曰袁曹方穆而洪為紹所用必不敗好招禍遠來赴此超曰子源天下義士大不背本也但恐見禁制不相及耳逮洪聞之果徒跣號泣並勒所令又從袁紹請兵

欲救超而紹終不聽超遂族滅洪由是怒紹絕不與通
紹興兵圍之不能下紹使洪邑人陳琳以書喻洪洪答
曰隔濶相思發於寤寐幸相去步武之間耳而以趣舍
異規不得相見其為悵恨難為心哉僕小人也本因行
役遂竊大州恩深分厚寧樂今日自還接办每登城勒
兵望主人之旗鼓感故友之周旋撫弦搦矢不覺流涕
之覆面也當受任之初自謂究竟大事共尊王室也豈
寤天下不悅本州見侵郡將邁庀請師見下辭行被拘

使洪故君有美里之厄洪謀計棲遲喪忠孝之名杖策攜背
虧交友之分揆此二者與其不得已輕重殊塗親疎異
畫故便收淚告絕用命此城正以君子之違不適讎國
故也吾聞之義不背親忠不違君昔晏嬰不降志於白
刃南史不曲筆以求生故身著圖篆名垂後世况僕據
金城之固驅士民之力散三年之畜以為一年之資但
懼秋風揚塵伯珪馬首南向北鄙告倒懸之急股肱奏
乞歸之記耳主人宜反旌退師治兵鄴垣何久辱盛怒

暴威於吾城下哉行矣孔璋足下徼利於境外臧洪投
命於君親吾子託身於盟主臧洪策名於長安子謂余
身死而名滅僕亦笑子生而無聞焉悲哉本同而末異
努力努力夫復何言紹見洪書知無降意增兵急攻之
城中穀盡外無強救洪自度必不免呼吏士謂曰袁氏
無道所圖不軌且不救洪郡將義不得不死念諸軍無
事空與此禍可先城未敗將妻子出吏士皆垂泣曰明
府與袁氏本無怨隙今一朝為郡將之故自致殘困吏

民何忍當舍明府去也男女七八千人相枕而死莫有
離叛城陷紹素親洪施帷幔大會諸將見洪謂曰臧洪
何相負若此今日服未洪據地瞑目曰諸袁事漢四世
五公可謂受恩今王室衰弱無輔翊之急欲因際會希
冀非望多殺忠良以立姦威洪親見呼張陳留為兄則
洪府君亦宜為弟同共戮力為國除害何有擁衆而觀
人屠滅惜力不能推刃為天下報讐何謂服乎紹本愛
洪意欲服而原之見洪辭切終不為用乃殺之冬十月

戊戌汜黨夏育高碩等欲共為亂脅乘輿西行侍中劉
艾見火起不止曰可出幸一營以避火難楊定董承將
兵迎天子幸楊奉營上將出夏育等勒兵欲止乘輿楊
定楊奉力戰破之斬首五千級壬寅行幸華陰寧輯將
軍段熲具服御及公卿已下資儲欲上幸其營熲與楊
定有隙迎乘輿不敢下馬侍中种輯素與定親乃言段
熲欲反上曰熲屬來迎何謂反對曰迎不至界拜不下
馬其色變也必有異心於是太尉楊彪司徒趙溫侍中

劉艾尚書梁紹等曰段煨不反臣等敢以死保車駕可
幸其營董承楊定言曰郭汜來在煨營詔曰何以知之
文禎左靈曰弘農督郵知之因脅督郵曰今郭汜將七
百騎來入煨營天子信之遂路次於道南丁未楊奉董
承楊定將攻煨使种輯左靈請帝為詔上曰王者攻伐
當上參天意下合民心司寇行刑君為之不舉而欲令
朕有詔邪不聽輯固請至夜半猶弗聽奉乃輒攻煨營
是夜有赤氣貫紫宮定等攻煨十餘日不下煨供給御

膳百官無有二意司隸校尉管邵以為不宜攻煨急應
解圍速至洛陽定等患之使楊奉請為已副欲殺之帝
知其謀不聽詔使侍中尚書告喻之定等奉詔還營李
傕郭汜悔令車駕東聞定攻段煨相招共救之因欲追
乘輿楊定聞傕汜至欲還藍田為汜所遮單騎亡走是
時張濟復與傕汜合謀欲留乘輿於弘農十二月行幸
弘農濟汜傕追乘輿衛將軍楊奉射聲校尉沮雋力戰
乘輿僅得免雋被創墜馬傕謂左右曰尚可活否雋罵

之曰汝等凶逆逼劫天子使公卿被害宮人流離亂臣賊子未有此也僉乃殺之雋時年二十五其督戰訾置負其屍而瘞之濟等抄掠乘輿物及秘書典籍公卿已下婦女死者不可勝數壬申行幸曹陽僉汜濟并力來追董承楊奉間使至河東招故白波帥李樂韓暹胡才及匈奴右賢王去卑率其衆來與僉等戰大破之斬首數千級詔使侍中史侍太僕韓融告張濟曰朕惟宗廟之重社稷之靈乃心東都日夜以冀洛陽邱墟靡所庇

廕欲幸弘農以漸還舊諸軍不止其競遂成禍亂今不

為足民在塗炭濟宿有忠亮乃心王室前之受命來和
催汜元功既建豈不惜乎濟其廩給百官遂究前勲昔
晉文公為踐土之會垂勲周室可不勉哉於是董承等
以新破催等可復東引詔曰催汜自知罪重將遂唐突
為吏民害可復待韓融還乃議進退承等固執宜進庚
申車駕發東董承李樂衛乘輿胡才楊奉韓暹匈奴右
賢王於後為距催等來追王師敗績殺光祿勲鄧淵廷

尉宣璠少府田芬御史鄧聘大司農張義是時司徒趙
溫太常王絳衛尉周忠司隸校尉管邵為僮所遮欲殺
之賈詡曰此皆大臣卿奈何害之也僮乃止李樂曰事
急矣陛下宜御馬上曰不可舍百官而去此何辜哉弗
聽是時虎賁羽林行者不滿百人僮等統營叫喚吏士
失色各有分散之意李樂懼欲令車駕御船過砥柱出
孟津詔曰千金之子坐不垂堂孔子慎憑河之危此所
謂安居之道乎太尉楊彪曰臣引農人也自此東有三

十六難非萬乘所登也宗正劉艾曰臣前為陝令知其險舊故有河師猶有傾危况今無師太尉所慮是也董承等以為宜令劉太陽使李樂夜渡具船舉火為應上與公卿步出營臨河欲濟岸高十餘丈不得下議欲續馬轡繫帝腰時后兄伏德扶后一手挾絹十四董承使荷令孫儼從人間斫后左靈曰御是何等人也以刀捍之殺旁侍者血濺后衣伏德以馬轡不可親腰以絹為輦下校尉向宏居前負帝下至河邊餘人皆匍匐下或

有從岸上自投冠幘皆壞既至河邊士卒爭赴舟董承
李樂以戈擊破之帝乃御船同舟渡者皇后貴人郭趙
二宮人太尉楊彪宗正劉艾執金吾伏完侍中种輯羅
邵尚書文楨郭浦中丞楊衆侍郎趙泳尚書郎馮碩中
官僕射伏德侍郎王稠羽林郎侯折衛將軍董承南郡
太守左靈府史數十人餘大官及吏民不得渡甚衆婦
女皆為兵所掠奪凍溺死者不可勝數衛尉士孫瑞為
宦所殺宦見河北有火遣騎候之適見上渡河呼曰汝

等將天子去邪董承懼射之以被為幔既渡幸李樂營
河東太守王邑來貢獻勞百官丁亥幸安邑王邑賦公
卿以下縣絹各有差封邑為列侯庚子拜胡才為征北
將軍領并州牧李樂為征西將軍領涼州牧韓暹為征
東將軍領幽州牧皆假節開府如三公遣太僕韓融至
弘農與催汜連和還所掠宮人公卿百官及乘輿車駕
數乘是時蝗蟲大起歲旱無穀後宮食棗菜諸將不能
相率上下亂糧食盡於是安東將軍楊奉衛將軍董承

征東將軍韓暹謀以乘輿還洛陽乙卯建義將軍張陽
自野王來與董承謀迎乘輿還洛陽安國將軍封晉陽
侯假節開府如三公袁術自以依據江淮帶甲數萬加
累世公侯天下豪傑無非故吏以為袁氏出陳舜之後
以黃乘赤得運之次時沛相陳珪故太尉球之子也術
與珪俱公族子孫少交遊書與珪曰昔秦失其政天下
羣雄爭而取之兼智勇者卒受其福今世紛擾復有瓦
解之勢誠英雄有為之時也與足下舊交豈肯左右之

乎若集大事子為吾心膺珪答書曰昔秦末世肆暴恣情虐流天下毒被生民民不堪命故遂土崩今雖季世未有秦苛暴之亂也曹將軍神武應期興復典刑掃平兇慝清定海內有徵矣足下當戮力同心匡翼漢室而陰謀不軌以身試禍豈不痛哉若迷而知反尚可以免吾備舊知請陳至情雖逆於耳骨肉之恩也天子之敗於曹陽術會其衆謀曰劉氏微弱海內鼎沸吾家四世公輔百姓所歸欲應天順民於諸君意何如衆莫敢對

主簿閻象進曰昔周自后稷文王積德累功三分天下
猶服事殷明公雖奕世克昌未有若周之盛漢室雖微
未有殷紂之暴術默然不悅遂造符命置百官焉

後漢紀卷二十八

欽定四庫全書

覆校官檢討臣李學錦

校對官庶吉士臣裴謙

謄錄監生臣任益春

欽定四庫全書薈要

史部
後漢紀卷二十九

詳校官編修臣汪鏞



欽定四庫全書蒼要卷六千九百八十四

史部

後漢紀卷二十九

晉 袁宏 撰

孝獻皇帝紀四

建安元年春二月執金吾伏完為輔國將軍開府如三公是時董承張陽欲天子還洛陽楊奉李樂不欲尚書

上官洪言還洛之議李樂輔洪由是諸將錯亂更相疑貳董承奔野王韓暹屯聞喜胡才楊奉之塢鄉欲攻韓暹上使人喻止之夏五月丙寅遣使至楊奉李樂韓暹

營求送至洛陽奉等從詔六月乙未車駕幸聞喜楊奉
胡才悔令乘輿去乃與李樂議欲還大駕詐言當遊澠
池東以避匈奴上不從庚子車駕從北道出傍山而東
無匈奴寇李樂愧其言懼而辭還是時糧食乏盡張陽
自野王迎乘輿賑給百官丙辰行至洛陽幸故常侍趙
忠宅張陽治繕宮殿丁丑大赦天下是月孫策入會稽
太守王朗與策戰敗績八月辛丑天子入南宮陽安殿
陽以為已功故因以名陽謂諸將曰天子當與天下共

之幸有公卿大臣陽當捍外難何事京都遂還野王楊
奉亦屯梁癸卯張陽為大司馬楊奉為車騎將軍韓暹
為大將軍領司隸校尉皆假節鉞是以州郡各擁兵自
為莫有至者百官窮困朝不及夕尚書已下自出採樵
或餓死牆壁間為吏兵所殺暹等各矜其功任意恣睢
干亂政事於是曹操議欲迎乘輿或曰山東未定韓暹
楊奉親與天子還京北連張陽未可卒制司馬荀彧勸
之曰昔高祖東征為義帝縞素而天下歸心自天子播

越將軍首唱義兵徒以山東擾亂未能遠赴關右然猶分遣將帥蒙險通使雖禦難於外乃心無不在王室是將軍匡天下之素志也今車駕旋軫義士有存本之思百姓懷感舊之哀誠因此時奉主上以從民望大義也秉至公以服雄傑大略也扶弘義以致英雋大德也天下雖有逆節必不能為累明矣韓暹楊奉其敢為害若不時定四方生心後雖慮之無能及也操從之辛卯操詣闕貢獻廩公卿以下操陳韓暹張陽之罪暹怖單騎

奔走上以暹陽有翼駕還洛之功一切勿罪於是誅羽
林郎侯折尚書馮碩侍中臺崇討有罪也封衛將軍董
承輔國將軍伏完侍中丁种輯尚書僕射鍾繇尚書郭
浦御史中丞董分彭城相劉艾左馮翊韓斌東萊太守
楊衆羅邵伏德趙懿為列侯賞有功也追贈射聲校尉
沮雋為弘農太守矜死節也符節令董昭說曹操曰將
軍興義兵以誅暴亂朝天子輔翼王室此五霸之功也
已下諸將人人殊異未必服從今留匡弼事勢不便唯

有移車駕幸許耳然朝廷播越新還舊都遠近企望冀一獲安今復徙車駕不厭衆心夫行非常之事乃有非常之功願將軍策其多者操曰此孤之本志也遂言幸許之計上從之庚申車駕東楊奉自梁欲要車駕不及已已車駕到許幸東營甲戌鎮東將軍曹操為大將軍更封武平侯操固讓不許太尉楊彪司空張喜以疾遜位冬十月戊辰右將軍袁紹為太尉紹耻班在操下不肯受操乃辭大將軍丙戌以操為司空領車騎將軍辛

卯曹操征楊奉於梁奉奔袁術呂布襲徐州劉備奔曹
操初陳郡人袁渙為劉備茂才避地江淮之間為呂布
所拘布令渙作書罵辱備渙曰不可再三強之不許布
大怒以兵脅之曰為之則生不為則死渙顏色不變笑
而應曰渙聞唯德可以辱人不聞以罵使彼固君子也
且不耻將軍之言彼誠小人也將復將軍之意則辱在
此不在於彼且渙他日之事劉備猶今日之事將軍也
如一旦去此復罵辱將軍可乎布慙而止渙字曜卿司

徒滂之子也渙少與弟微俱以德行稱是時漢室衰微
天下將亂渙與微閑居從容謀安身避亂之地渙慨然
歎曰漢室陵遲亂無日矣苟天下不靖逃將安之若天
將喪道民以義存唯強而有禮可以庇身乎微曰古人
有言知機其神乎見機而作君子所以元吉也天理盛
衰漢其已矣夫有大功必有大事此又君子之所深識
退藏於密者也且兵革之興外患衆矣微將遠蹈山海
以求免乎天下淆亂各行其所志微避地至交州渙展

轉劉備袁術呂布之間晚乃遇曹公渙說操曰夫兵者
凶器也不得已而用之鼓之以道德征之以仁義兼撫
其民而除其害夫然故可與之死可與之生自大亂以
來十數年矣民之欲安甚於倒懸然而暴亂未息者何
也政失其道歟復聞明君善於救世亂則濟之以義偽
則鎮之以樸世異事變治國不同不可不察也夫制度
損益此古今之不必同者也若夫惠愛天下而反之於
正雖以武平禍亂而濟之以德誠百王不易之道也公

明哲超世古之所以得其民者公既勤之矣今所以失其民者公既戒之矣海內賴公得免於危亡之禍然而民未知義唯公所訓之則天下幸甚操重渙言以為軍諮祭酒渙常謂人曰夫居兵亂之間非吾所長每謙不敢處也張濟自關中走南陽為飛矢所中死從子繡領其衆屯宛天子既免曹陽賈詡去李傕託於段熲頃之復歸張繡

二年春正月曹操征張繡繡降其季父濟妻國色也操

以為妾繡由是謀叛襲操七軍大敗之殺其二子自曹操之迎乘輿也袁紹內懷不服紹既兼河朔天下畏其強操方東憂呂布南距張繡及繡敗操軍紹益自驕而與操書悖慢操大怒動止容變於常衆皆以為失利於繡故也僕射鍾繇以問尚書令荀彧彧曰公以明哲必不追咎往事也殆有他慮乎遂見操以問焉操以紹書示之且曰今將征不義而力不敵如何彧對曰古之成敗誠有其材雖弱必強苟非其人其強易弱劉項之事

足以觀矣今與公爭天下者唯袁紹紹貌外寬內忌任人而疑其心公明達不拘唯材所宜不問疎賤此度勝也紹遲重少決失在後機公能斷大事應變有方此謀勝也紹御軍寬緩法令不一士卒雖衆而實難用公法令嚴明賞罰必行士卒雖寡皆爭致死此武勝也紹憑世資從容飾智收名譽故士之寡能好聞者歸之公以至仁待士又推誠心不為虛美行已謙恭儉約而與有功者無吝故忠正殺身之士咸願為用此德勝也夫此

四勝仗義征伐誰敢不從紹以四失背忠自專強何能
為操悅秋七月即拜太尉袁紹為大將軍於是馬日磾
喪還京師將欲加禮少府孔融議曰日磾以上公之尊
乘旄節之使銜命直指寧輯東夏而曲媚賊臣為所牽
率章表署用輒使首名附下罔上姦以事君昔國佐當
晉軍而不撓宜僚臨白刃而正色王室大臣不得見脅
為辭鄭人討幽公之亂斲子家之棺聖人哀矜未忍追
治不宜加禮冬十月謁者僕射裴茂督三輔諸軍討李

卷二十九
催也

三年春正月破催斬之夷三族郭汜為其將伍習所殺
李樂病死胡才為怨家所殺張陽為其將睦固所殺馬
騰韓遂涼州自相攻擊五月韓暹楊奉死秋七月曹操
征張繡破之荀彧說曹操曰不先取呂布河北未易圖
也操曰若袁紹侵擾關中西羌南誘蜀漢是我獨以充
州抗天下五分之一也為之奈何彧曰關中將帥以十
數莫能久相一唯韓暹馬騰最強彼見山東之敗必各

擁衆自保全若撫以恩德使連和相推雖不能久要公
定山東足以不動鍾繇可屬以西事公無憂也操從之
九月曹操征呂布是歲袁紹自立為天子術與楊彪婚
親也操忌彪忠正收彪付獄將殺之孔融聞之不及朝
服往見操曰楊彪累世清德四菜重光周書父子兄弟
罪不相及况袁氏之罪乎易稱積善餘慶但欺人耳操
曰國家之意也融曰假使成王欲殺召公則周公可得
言不知耶今天下纓綈縉紳之士所以仰瞻明公者以

輔相漢室舉直措枉致之雍熙也今橫殺無辜則海內
觀聽誰不解體孔融魯國之男子明日便當拂衣而去
不復朝也操意解乃免彪覩漢祚將微自以累世公輔
耻事異姓遂稱疾不行徵鄭玄為大司農不至玄字康
成北海高密人也為嗇夫隱恤孤苦閭里安之家貧雖
得休假常詣校官誦經太守杜密異之為除吏錄使得
極學玄之右扶風事南郡太守馬融融門徒甚盛弟子
以次相受至三年不得見玄講習彌篤晝夜不倦融見

奇之引與相見自篇籍之奧無不精研歎曰詩書禮樂
皆以東矣會黨事起而玄教授不輟弟子數百人中平
初悉解禁錮玄已六十餘矣始為王公辟命一無所就
者玄身長八尺秀眉朗目造次顛沛非禮不動黃巾賊
數萬人經玄廬皆為之拜高密一縣不被抄掠袁紹嘗
遇玄而不禮也趙融聞之曰賢人者君子之望也不禮
賢是失君子之望夫有為之君不失萬民之歡心況於
君子乎失君子之望難乎有為也

四年春曹操獲呂布斬之二月司空曹操讓位於太僕
趙岐不聽三月衛將軍董承為車騎將軍封操三千戶
討呂布之功也固讓不受三月袁紹討公孫瓚六月拜
孫策為會稽太守討逆將軍封吳陽侯初彭城人張昭
避亂淮南策賓禮之及策東略遂為之謀主聞袁術僭
號昭為策書諫術曰昔者董卓無道陵虐王室禍加太
后暴及弘農天子播越宗廟焚毀是以豪傑發憤赫然
俱起元惡既斃幼主東顧乃使王人奉命宣明朝恩偃

武修文與之更始而河北異謀黑山不順劉表僭亂於南公孫叛逆於北劉繇阻兵劉備爭盟是以未獲承命囊弓戢戈也當謂使君與國同規舍是不卹完然有自取之志懼非海內企望之意昔湯伐桀稱有夏多罪武王伐紂曰殷有重罰此二王者雖有聖德假使時無失道之過何由逼而奪之也今主上豈有惡於天下徒以幼小脅於僭臣異於湯武之時也又聞幼主明智聰敏有夙成之德天下雖未被恩咸以歸心焉若輔而興之

旦奭之美率土之所望也使君五世相承為漢宰輔榮寵之盛莫與為比宜効忠守節以報漢室世人多惑圖緯之言妄牽非類之文苟以悅主為美不顧成敗之計今古所慎也忠言逆耳駁議致憎苟有益於尊明則無所敢辭術始自以為有淮南之衆料策之必與已合及得其書遂愁沮發疾袁紹自破公孫瓚貢御希慢私使主簿耿苞密白白赤德運衰歷數將改宜順天意以應民望紹以苞白事咨於軍府議者咸以苞為妖妄宜誅

紹殺苞以悅衆然遂有逆謀於是紹將南出師以攻曹操沮授田豐諫曰師出歷年百姓疲弊倉庫無積賦役方殷此國之深憂也宜遣使獻捷天子務農逸民若不得通乃表曹操隔我王路然後進屯黎陽漸營河南益作船舫繕治器械分遣精騎抄掠邊鄙令彼不得安我取其逸三年之中事可坐定也審配郭圖曰兵書之法十圍五攻敵則能戰今以明公之神武跨河朔之人衆以伐曹氏譬若覆手今不時取後難圖也授曰蓋救亂

誅暴謂之義兵恃衆憑強謂之驕兵兵義無敵驕者先
滅曹氏迎天子建宮許都今興師南向於義則違且廟
勝之策不在強弱曹氏法令既行士卒精鍊非公孫瓚
坐而受圍者也今棄萬安之術而興無名之兵竊為公
危之圖曰武王伐紂不為不義況曹氏而云無稱且公
師武臣勇將士憤怒人思自騁而不及時早定大業慮
之失者夫天與不取反受其咎此越之所以霸吳之所
以亡也監軍之計而非見時知機之變紹從之圖等因

是譖授曰授監統內外威震三軍若其浸盛何以制之
夫臣與主同者昌主與臣同者亡黃石之所忌也且御
衆於外不宜知內紹疑焉乃分監軍為三都督使授及
郭圖淳于瓊各典一軍遂南冬十一月張繡賈詡降曹
操十二月甲辰司隸校尉鍾繇持節鎮撫關中庚辰曹
操率師拒袁紹於官渡孔融謂荀彧曰紹地廣兵強田
豐許攸智計之士也為之謀審配逢紀盡忠之臣也任
其事顏良文醜勇冠三軍統其兵殆難剋乎彧曰紹兵

雖強而法不整田豐剛而犯上許攸貪而不治審配專而無謀逢紀果而自用此二人留知後事者攸犯其法必不能從也攸必為變顏良文醜一夫之勇耳可一戰而擒也袁術欲北至青州曹操使劉備要擊之會術病死操悔遣備追之不及備遂據下邳

五年春正月壬午車騎將軍董承偏將軍王服謀殺曹操發覺伏誅初承與劉備同謀未發而備出謂服曰郭汜有數百兵壞李傕數萬人但足下與吾同不耳昔呂

不韋之門須子楚而後高今吾與子猶是也服惶恐不敢當然兵又少承曰興事訖得曹公成兵不足邪服曰今京師豈有所任者乎承曰長水校尉种輯議郎吳碩是吾心腹辦事者輯碩皆被誅曹操攻劉備奔袁紹二月遣沮授郭圖淳于瓊顏良等攻劉延於白馬紹引兵至黎陽沮授臨發會其宗族散資財以與之曰夫勢存則威無不行勢亡則不保一身哀哉其弟宗曰曹公士馬不敵兄何懼焉授曰以曹兗州之明略又挾天子為

資我雖剋伯珪衆實疲弊而將校主銳軍之破敗在此
舉矣揚雄有言曰六國蚩蚩為羸弱姬今之謂矣夏四
月曹操救劉延大戰斬顏良秋七月辛巳立皇子馮為
河陽王壬午南陽王薨八月袁紹將濟河沮授諫曰勝
負變化不可不詳今宜留屯延津分兵官渡若剋獲還
迎不晚設其有難衆不可還紹不從授臨濟歎曰上盈
其志下務其功悠悠黃河吾其反乎遂以疾辭紹恨之
乃省其所部併屬郭圖遂軍官渡紹衆盛操軍大懼與

荀彧書議欲還許以引紹彧報曰紹聚官渡欲與決勝負公以至弱當至強若不制必為所乘是天下之大機也且紹布衣之雄能聚人而不能用以公神武明哲而奉以大順何向而不濟今軍食雖少未若楚漢在滎陽成臯間也是時劉項莫肯先退先退者勢屈也公以十分居一之衆畫地而守之扼其喉而不能進已半年矣情見勢竭必將有變此用奇之時不可失也操從之劉備去袁紹南奔汝南九月庚子朔日有蝕之詔公卿

各上封事靡有所諱袁曹相持於官渡孫策欲襲許迎
乘輿部署未發為許貢客所害先吳郡太守許貢為策
所殺其小子與客謀報曰孫策勇銳若多殺人於道策
必自出則可擒也客從之乃殺人於江邊策聞之怒單
騎自出客刺傷之將死謂張昭曰中國亂以吳越之衆
三江之固足可觀成敗公等善輔吾弟呼權佩以印綬
曰舉江東之衆決機於兩陣之間與天下爭衡卿不如
我任賢使能各盡其力以保江東我不如卿初策在吳

與張昭論曰今四海未定當以武平之耳吳人陸績年
少在坐末大聲言曰昔管夷吾相齊桓公九合諸侯一
匡天下不用兵車孔子曰遠人不服則修文德以來之
今諸君不務道德懷取之術而唯尚武績雖童蒙竊所
未安也昭等異焉績容貌雄壯博學多識星厯算數無
不該覽及權統事辟奏曹掾以直道見憚出為鬱林太
守加偏將軍績意在儒雅非其志也雖在軍旅著述不
廢作渾天圖注易釋玄皆傳於世預自知亡日乃為辭

曰有漢志人吳郡陸績幼敦詩書長翫禮易受命南征
遘疾逼厄遭命不永嗚呼悲隔又曰從今已去六十年
之外車同軌書同文恨不及見也十一月甲子曹操與
袁紹戰於官渡紹師大潰沮授為操軍人所執授大呼
曰授不降也為所執耳操與之有舊逆謂之曰分野殊
異遂用阻絕不圖今日乃相擒也授對曰冀州失策以
取奔北授智力俱困宜其見擒操曰本初無謀不相用
計今喪亂過紀國家未定當相與圖之授曰叔父母弟

懸命袁氏若蒙公靈速死為福公歎曰孤早相得天下不足慮也遂舍而厚遇之頃之謀歸袁氏操殺之

六年春三月曹操以袁紹新敗欲悉軍以征劉表以問尚書令荀彧彧曰今紹之敗其衆離心宜因而遂定而欲遠背兗豫南軍江漢夫困獸猶鬪況在紹乎若紹收其餘燼承虛以出則公之事去矣四月曹操將兵於河上八月辛卯侍中郗慮尚書令荀彧司隸鍾繇侍講于內冬十一月曹操征劉備奔劉表屯新野

七年夏五月庚戌袁紹發病死初紹有三子譚熙尚譚長而惠尚少而美紹妻愛尚數稱其才紹以奇其貌欲以為後乃出譚為青州刺史沮授諫曰世稱一兔走衢萬人逐之一人獲之貪者悉止分定故也且年均以賢德均則卜古之制也願上推先代成敗之誠下思逐兔分定之義紹曰孤欲令三子各據一州以觀其能授出曰禍其始此矣及紹未命而死其別駕審配護軍逢紀宿以驕侈為譚所疾於是紀外順紹妻內慮私害乃矯

詔遺命奉尚為嗣譚至不得立自稱車騎將軍由是有隙譚軍黎陽九月曹操征譚尚越雋男子化為婦人周羣曰將有易代之事者

八年春操破譚尚秋七月曹操上言守尚書令荀彧自在臣營叅同計畫周旋征伐每皆剋捷奇策密謀悉皆共決及彧在臺常私書往來大小同策詩美腹心傳貴廟勝勲業之定彧之功也而臣前後獨荷異寵心所不安彧與臣事通功並宜進封賞以勵後進者於是封彧

為萬歲亭侯八月曹操征劉表軍次西平譚尚爭冀州

九月公卿迎氣北郊始用八佾冬十月曹操至黎陽

九年夏四月操拔邯鄲秋八月曹操破鄴袁尚熙奔匈奴

辛巳封蕭何後為安衆侯九月太中大夫孔融上書

曰臣聞先分九圻以遠及近春秋內諸夏而外夷狄詩

云封畿千里惟民所止故曰天子之居必以衆大言之

周室既衰六國力征授賂割裂諸夏鎬京之制商邑之

度歷載彌久遂以闇昧秦兼天下政不遵舊革刻五等

掃滅侯甸築城萬里濱海立門欲以六合為一區五服
為家關衛不要遂使陳項作難家庭臨海擊柝不救聖
漢因循未之匡改猶依古法潁川南陽陳留上黨三河
近郡不封爵諸侯臣愚以為千里國內可略從周官六
鄉六遂之文分取北郡皆令屬司隸校尉正以王賦以
崇帝室投自近以寬遠繇華貢獻外薄四海揆文奮武
各有典書帝從之戊辰以司空曹操領冀州牧或說操
曰宜復古制置九州則所制者廣大天下服矣操將從

之荀彧言於操曰冀州求公領牧以要民心甚善至於分改九州竊有疑焉若是冀州當取河東馮翊扶風西河并幽之地所奪者衆前日公破袁尚擒審配海內震駭人人自恐不保其土地守其兵衆也今便分屬冀州將皆動心且人多說關右將士以動心之計今聞此必以為次第見奪一旦生變有守善者轉相脅為非則袁尚得寬其死而袁譚懷貳劉表遂有江漢之間天下未易圖也願公引兵先定河北然後修復舊京南臨荊州責

王貢之不入則天下咸知其意人人自安天下大定乃議古制操曰微足下失之者多矣遂寢九州之議十月有星孛於東井分涼州四郡為梁州

十年春正月曹操攻袁譚於南皮大破斬之丁丑增封操萬三千戶平幽冀之功也八月侍中荀悅撰政治得失名曰申監既成而奏之曰夫道之本仁義而已五典以經之羣籍以緯之詠之歌之絃之舞之前監既明後復申之致治之術先屏四患乃崇五政一曰偽二曰私

三曰放四曰奢偽亂俗私壞法放越軌奢敗制四者不
除則政末由行矣其致也俗亂則道荒雖天下不得保
其性也法壞則世傾雖人主不得守其度也軌越則禮
亡雖聖人不得全其行矣制敗則欲肆雖四表不得充
其求矣是謂四患修農桑以養其生審好惡以正其俗
置文教以章其化立武備以秉其威制賞罰以統其法
是謂五政民之不畏死不可懼以罪人不樂生不可勸
以善雖使契布五教咎繇作士政不行矣故在上者先

豐民財以定其志帝耕籍田后桑蠶宮國無遊民野無
荒業財賈不用力不妄加以周民事是謂養生君子之
所以動天地感神明正萬物而成至治者必乎鎮定而
已故在上者審定好惡既安乎功罪毀譽亦終於準驗
聽言責事舉名察實無或作詐偽淫巧以蕩衆心故事
無不核物無不功善無不顯惡無不彰俗無姦詐民無
淫風百姓上下覩利害之存乎已也故肅敬其心內不
回惑外無異望則民志平矣是謂正俗君子以情用小

人以刑用榮辱者賞罰之精華也故禮教榮辱以加君子化其情也桎梏以加小人化其刑也君子不犯辱況於刑乎小人不忘刑況於辱乎若其在中人之倫則禮刑兼焉教化之廢推中人而墮於小人之域教化之行引中人而納於君子之塗是謂章化小人之情緩則驕驕則怠怠則怨怨則叛危則謀亂安則思欲非威強無以懲之故在上者必有武備以戒不虞以遏寇虐安居則寄之內政有事則用之軍旅是謂秉威賞罰政之柄

也賞明罰審信順令行賞以勸善罰以懲惡人主不妄
賞非徒愛其財也賞妄行則善不勸矣不妄罰非徒矜
其人也罰妄行則惡不懲矣賞不勸謂之止善罰不懲
謂之縱惡在上者能不止下為善不縱下為惡則國法
立矣是謂統法四患既蠲五政既立行之以誠守之以
固簡而不怠踈而不失無為為之使自施之無事事之
使自安之不肅而成不嚴而治垂拱揖讓而海內平矣
古者天子諸侯有事必告于廟廟有二史左史記言右

史記事事為春秋言為尚書君舉必記善惡成敗無不存焉下及士庶苟有茂異咸在載籍或有欲顯而不得欲隱而名彰得失一朝榮辱千載善人勸焉淫人懼焉可備史官掌其典常上覽而善焉悅字仲豫潁川人也少有才理兼綜儒史是時曹公專政天子端拱而已上既好文章頗有才意以漢書為繁使悅刪取其要為漢紀三十篇冬十一月并州刺史高幹反

十一年正月有星孛於北斗占曰人主易位曹操征高

幹斬之己丑增封操并前三萬戶食柘城陽夏四縣比
鄧禹吳漢故事秋七月武威太守張猛殺涼州刺史商
邯

後漢紀卷二十九

欽定四庫全書薈要卷六千九百八十五

史部

後漢紀卷三十

晉 袁宏 撰

孝獻皇帝紀五

十二年春曹操上表曰昔袁紹入郊甸戰於官渡時兵少糧盡圖欲還許荀彧乃建進討之規遂摧大逆覆取其衆此或覩勝敗之機畧不出世紹既破敗臣糧亦盡以為河北未易圖也欲南討劉表彧復止臣陳其得失臣用反於是遂平四州向使臣退於官渡紹必鼓行而

前遂征劉表則河北延其凶計或之二策以亡為存以禍為福臣所不及也是故先帝貴指縱之功薄搏獲之賞古人尚帷幄之規下攻拔之捷原其績效足享高爵而海內未喻其狀所受不侔其功臣誠惜之乞重平議增疇戶邑或深辭讓操報之曰君之策謀非但所表二事而已前後謙冲欲慕魯連先生乎此聖人達節者所以貴也昔介子推有言竊人之財猶謂之盜况君密謀安衆先於孤者以百數乎以二事相還而復辭何取謙

亮多邪三月癸丑增封守尚書令或戶一千并前二千
戶操欲表為三公或使荀攸深讓至于十數乃止是時
曹公世子聰明尊雋宜高選天下賢哲以師保之輔成
王德及征行軍宜以為副貳使明御軍用兵之道操從
之秋八月曹操登白狼山與匈奴冒頓戰大破斬之袁
尚熙奔遼東太守公孫康斬尚熙首送京師乙酉封操
三子為列侯操不受冬十月星孛於鶉尾乙酉濟南王
斌為黃巾所殺劉備屯新野荊州豪傑歸者日衆琅邪

陽都人諸葛亮字孔明躬耕隴畝好為梁甫吟身長八尺嘗自比於管仲樂毅時人莫之許也唯博陵崔州平潁川徐元直與亮友善謂之信然於是徐庶見劉備曰諸葛孔明卧龍也將軍豈願見之乎備曰君與俱來庶曰此人宜可以就見不可屈致將軍且枉駕顧之由是備三詣其廬因屏人而言曰漢室傾頽姦臣竊命主上蒙塵孤不量力度德欲信大義於天下而智術淺短遂用猖蹶至于今日然志猶未已君為計將安出亮答曰

自董卓以來豪傑並起跨州連郡不可勝數曹操比於
袁紹則名微而衆寡遂能剋紹以弱為強此非唯天時
抑亦人謀也今已擁百萬之衆挾天子而令諸侯此誠
不可與爭鋒孫權據有江東已歷三世國險而民附賢
能為之謀此可與之為援不可圖也荊州北據漢沔利
盡南海東連吳會西通巴蜀此用武之國而其主不能
殆天將所以資將軍也益州險塞沃野天府之地高祖
因之以成帝業劉璋闇弱張魯在北民殷國富而不知

存卹智能之士思得明后將軍既帝室之胄信義著於四海總覽英雄思賢如渴若跨有荆益保其巖阻西和諸戎南撫夷越結好孫權內修政治天下有變命一上將將荊州之軍以向宛洛將軍身率益州之衆出於秦川百姓孰不箪食壺漿以迎將軍者乎如是霸業可成漢室復興也備曰善於是與亮情好日密諸將不悅備解之曰孤之有孔明猶魚之得水願諸君勿復言

十三年春正月癸未司徒趙溫請置丞相秋七月曹操

征劉表八月丁未光祿大夫郗慮為御史大夫初操以穀少禁酒太中大夫孔融以為不可與操相覆疏因以不合意時中州畧平惟有吳蜀融曰文德以來之操聞之怒以為怨誹浮華乃令軍諮祭酒路粹傳致其罪壬子太中大夫孔融下獄誅妻子皆棄市融字文舉魯國人孔子二十世孫幼有異才年十餘歲隨父詣京都時河南尹李膺有重名勅門通簡賓客非當世英賢及通家子孫不見也融欲觀其為人遂造膺門曰我是李君

通家子孫門者白膺請見曰高明父祖嘗與僕周旋乎
融曰然先君孔子與君李老君同德比義而相師友則
僕累世通家也衆坐莫不歎息僉曰異童子也太中大
夫陳禕後至同坐以告禕曰小時了了者至大亦未能
奇也融曰如足下幼時豈嘗惠乎膺大笑謂融曰高明
長大必為偉器年十三喪父哀慕毀瘠杖而後起州里
稱其至孝初山陽張儉與融兄裒友善亡命來詣裒適
出時融年十六儉不告融知儉長者有窘迫色謂曰吾

獨不能為君主也因留舍藏之後以人客發泄國相以下密就掩捕儉得脫走收融及裒送獄融曰保內藏舍者融也當坐之裒曰彼來求我求我之由非弟之過我當坐之兄弟爭死郡縣疑不能決乃上讞詔書令裒坐之融由是顯名年二十八為北海太守先是黃巾破青州融收合夷民起兵自守賊張餘等過青州融逆擊為其所敗收餘兵保朱虛稱詔誘吏民復置城邑崇學校庠序舉賢貢士表顯耆儒以彭璆為方正邴原有道王

修為孝廉告高密縣為鄭玄特立鄉名曰鄭公鄉又國
人無後及四方遊士有死亡皆為棺木而殯葬之使甄
子然臨配食縣社其禮賢如此劉備表融領青州刺史
年餘為羣賊所攻不能自守建安初徵為將作大匠遷
少府每朝會訪對輒為議主諸卿大夫寄名而已初潁
川陳紀論復肉刑書曰惟敬五刑以成三德易著剗剔
滅趾之法所以輔政助教懲惡息殺也且殺人償死合
於古制至於傷人或殘毀其體而纔翦毛髮非其理也

若用古刑使淫者下蠶室盜者肘其足永無淫放穿窬之姦矣融難之曰古者吏端刑清治無過差百姓有罪皆不之濫末世凌遲風化壞亂法侮其民故曰上失其道民散久矣而欲繩之以古制投之以殘棄非所謂與時消息也紂斬一朝涉之脛天下謂之無道九牧之地千八百君若各刖一人是下常有千八百紂也求世休和不可得已且被刑之人慮不全生志在思死類多趨惡夙沙亂齊伊戾禍宋趙高英布為世大患雖忠如鬻權信

如卞和智如孫臏冤如巷伯才如史遷達如子政一離刀
鋸沒世不齒是太甲之思庸穆公之霸秦陳湯之都賴魏
尚之邊功無復悔也曹公將復肉刑以衆議不同乃止

袁宏曰夫民心樂全而不能常蓋利用之物懸於外而
嗜慾之情動於內也於是有進即凌競之行希求放肆
不已不能充其嗜慾也則苟且僥倖之所生也希求無
厭無以疎其欲也則姦偽忿怒之所興也先王知其如
此而欲救弊故先以德禮陶其心其心不化然後加

以刑辟書云百姓不親五品不遜汝作司徒敬敷五教在寬蠻夷猾夏寇賊姦宄汝作士五刑有服然德刑之設叅而用之者也三代相因其義詳焉周禮使墨者守門劓者守閭宮者守內刖者守圉此肉刑之制可得而論也荀卿亦云殺人者死傷人者刑百王之所同未知其所由來者也夫殺人者死而相殺者不已是大辟可以懲未殺不能使天下無殺傷人者刑而害物者不息是黥劓可以懼未刑不能使天下無刑也故將欲止

之莫若先以德禮夫罪過彰著然後入於刑辟是將殺人者不必刑也縱而不死則陷於刑辟矣故刑之所制在於不可移之也禮教則不然明其善惡所以潛勸其情消於未然也示以耻辱所以內化其心治之未傷也故過而不至於著罪薄而不及於刑也終入辜辟者非教化之所得也故雖殘一物之生刑一人之體是除天下之害夫何傷哉率斯道也風化可以漸淳刑罰可以漸少其理然也苟不化其心而專任刑罰民失義方動陷

刑網求世休和焉可得哉周之成康宣案三千之文而致刑措之美乎蓋德化刑清所致斯有由也漢初懲酷刑之弊務寬厚之論公卿大夫相與耻言人過文帝登庸加以玄默張武受賂賜金以愧其心吳王不朝崇禮以讓其失是以吏民樂業風化篤厚斷獄四百幾于刑措豈非德刑用之効哉世之論者欲言刑罰之用不先德教之益失之遠矣今大辟之罪與古同制免死以下不過五歲既釋鉗鑕復齒於人是以民不耻惡數為盜

姦故刑徒多而亂不治也苟教之所去一離刀鋸沒身
不齒鄰里且猶耻之而况朝廷乎如此則夙沙趙高之
儔無所施其惡則陳紀所謂無淫放穿窬之姦於是全
矣古者察言觀行而善惡彰焉然則君子之去刑辟固
已遠矣設有不幸則八議之所宥也若天下知史遷之
冤淫刑之所及也苟失其道或不免於大辟而况肉刑
哉又相刑之與枉殺人其理不同則死生之論善已踈
矣漢書斬右趾及殺人先自告吏坐受財守官物而即

盜之皆棄市此班固所以謂當生而令死者也今不忍
截刻之慘而安勦絕之悲此皆治體之所先而有國所
宜改者也劉表病死少子琮領荊州九月劉琮降曹操
劉備率衆南行曹操以精騎追之及於當陽備與諸葛
亮等數十騎斜趣漢津徐庶母見獲庶辭備而指其心
曰本與將軍共圖王霸之業以此方寸之地也今失老
母方寸亂矣無益於事請從此辭遂詣曹操既有荆
州水軍十萬將順流東伐吳人振恐議者咸勸孫權迎

操周瑜曰不然操雖託名漢相其實漢賊將軍以神武
雄才兼仗父兄之烈割據江東地方數千里精兵足用
英豪樂業尚當橫行天下為漢除殘去害況操自送死
何迎之有瑜得精兵三萬保為將軍破之權曰老賊欲
廢漢天子自立久矣徒忌二袁劉表與孤耳今數雄已
滅唯孤存孤與老賊勢不兩立君言當擊甚與孤合此
天以君授孤也劉備至夏口諸葛亮謂備曰事急矣請
求救於孫將軍時權軍於柴桑備使亮說權曰海內喪

亂將軍起兵江東豫州亦收衆漢南與曹操並爭天下
今操芟夷大難畧平矣遂破荊州威振四海英雄無所
用武故豫州遁逃至此將軍量力而處之若能以吳越
之衆與中國抗行不如早與之絕若不能何不案戈束
甲北面而事之乎今將軍外託服從之名內懷猶豫之
計事急而不斷禍至無日矣權曰苟如君言劉豫州何
不事之乎亮曰田橫齊之壯士耳猶義不辱況豫州王
室之胄英才蓋世人之仰慕若水之歸海事之不濟此

乃天也安能復為之下權勃然曰吾不能以全吳之地
十萬之衆受制於人吾計決矣非劉豫州莫可當曹操
者然豫州新敗之後復能抗此難乎亮曰豫州雖敗戰
士還者精甲萬人曹操之衆遠來疲弊聞追豫州騎一
日一夜行三百里此所謂强弩之末不能穿魯縞者也
故兵法忌之曰必蹙上將軍且北方之人不習水戰又
荊州之民附操者逼以兵勢耳非心服也將軍誠能命
猛將統兵數萬與豫州協規同契破操必矣操敗必北

還如此則荆吳之勢強鼎足之形成成敗之機在於今日權大悅即遣周瑜將水軍三萬隨亮詣備并力拒操冬十月癸未日有蝕之十二月壬午徵前將軍馬騰為衛尉是月曹操與周瑜戰於赤壁操師大敗

十四年劉備以孫權行車騎將軍備自領荊州屯公安七月曹操征孫權冬十月晦日有蝕之

十五年春二月乙巳日有蝕之

十六年春正月辛巳以曹操世子丕為五官中郎將副

丞相三月馬超韓遂反秋七月操征超遂大破之是歲
劉備入益州

十七年春正月加曹操入朝不趨劔履上殿贊拜不名
夏五月癸未誅衛尉馬騰超之父也六月庚寅晦日有
蝕之秋七月庚戌立皇子臨為濟陰王懿為山陽王邈
為濟北王敦為東海王冬十月曹操征孫權侍中尚書
令荀彧勞軍於譙初董昭等謂曹操宜進爵郡公九錫
備物以彰殊勲密以語彧彧曰曹公本興義兵以匡朝

寧國秉忠貞之誠守退讓之實君子愛人以禮不宜如此操由是心不平之是行也操請或勞軍因留或以侍中光祿大夫持節丞相軍事次壽春或以憂死

袁宏曰夫默語者賢人之畧也政卷舒廢興之間非所謂以智屈伸貴其多算權其輕重而揣難易君子之行已也必推其心而達其道信其誠而行其義義不違心故百姓知其無私道不失順則天下以為至當其出也忠著於時君仁及於天下匹夫匹婦莫不咨嗟者以其

致功之本義和也若時不我與中道而廢內不負心外
不媿物千載之下觀其迹而悲其事以為功雖不就道
將可成也及其默也非義而後退讓謀而後止蓋取舍
不同故宛龍蟠以求其志雖仁者之心大存兼愛援手
而陷於不義君子不為也苟違斯道四體且猶致患而
況萬物乎漢自桓靈君失其柄陵遲不振亂殄海內以
弱致弊虐不及民劉氏之澤未盡天下之望未改故征
伐者奉漢拜爵賞者稱帝名器之重未嘗一日非漢魏

之平亂資漢之義功之剋濟荀生之謀謀適則勲隆勲隆則移漢劉氏之失天下荀生為之也若始圖一匡終與勢乖情見事屈容身無所則荀生之識為不智矣若取濟生民振其塗炭百姓安而君位危中原定而社稷亡於魏雖親於漢已踈則荀生之功為不義也夫假人之器乘人之權既而以為己有不以仁義之心終亦君子所耻也一汙猶有慙色而況為之謀主功奮於當年迹聞於千載異夫終身流涕不敢謀燕之徒隸者自己

為之功而已死之殺身猶有餘媿焉足以成名也惜哉
雖名蓋天下而道不合順終以憂卒不殞不與義故曰
非智之難處智之難非死之難處死之難嗚呼後之君
子默語行藏之際可不慎哉

十八年春二月庚寅省幽州并州以其郡國并屬冀州
省司隸校尉以其郡國分屬豫州省梁州以其郡國并
屬冀州夏五月丙申天子使御史大夫郗慮持節策命
曹操為公曰朕以不德少遭憫凶越在西土遷在唐衛

當此之時殆若綴旒宗廟乏祀社稷無位羣兇覬覦分
裂諸夏率土之民朕無獲焉即我高祖之命將墜於地
朕用夙興假寐振悼于厥心曰惟考惟祖股肱先正其
孰恤朕躬乃誘天衷誕育丞相保乂我皇家弘濟於艱
難朕實賴之今將授君典禮其敬聽朕命昔者董卓初
興國難羣后釋位以謀王室君則首啓戎行此君之忠
於本朝也後及黃巾反易天常侵我三州延及平民君
又翦之以寧東夏此又君之功也韓暹楊奉專用威命

君則致討克黜其難遂遷許都造我京邑設官兆祀不失舊物天地鬼神於是獲乂此又君之功也袁術僭逆肆于淮南懾懾君靈用丕顯謀蕲陽之役橋蕤授首稜威南邁術以殞潰此又君之功也廻戈東征呂布就戮乘輅將反張陽殂斃睦固伏罪張繡稽服此又君之功也袁紹逆常謀危社稷憑恃其衆稱兵內侮當此之時王師寡弱天下寒心莫有固志君秉大節精貫白日奮其武怒運其神策致屈官渡大殲醜類俾我國家拯於

危墜此又君之功也濟師黃河拓定四州袁譚高幹咸
梟其首海盜奔迸黑山順軌此又君之功也烏桓三種
崇亂二世袁尚因之逼處塞北東馬縣車一征而滅此
又君之功也劉表背誕不供貢賦王師首路威風先逝
百城八郡交臂屈膝此又君之功也馬超成宜同惡相
濟濱據河潼求逞所欲殄之渭南獻馘萬計遂定邊城
撫和戎狄此又君之功也鮮卑丁零重譯而至單于白
屋請吏率職此又君之功也君有定天下之功重之以

明德班序海內宣美風俗旁施勤教表繼絕世舊德前
功罔不咸秩雖伊尹格于皇天周公光于四海方之蔑
如也朕聞先王並建明德祚之以土分之以民崇其寵
章備其禮物所以蕃衛王室左右厥世也其在周成管
蔡不靜懲難念功乃使邵康公賜齊太公履東至于海
西至於河南至于穆陵北至于無棣五侯九伯實得征
之世祚太師以表東海爰及襄王亦有楚人不恭王職
又命晉文登為侯伯錫以二輅虎賁斧鉞鉅鬯弓矢大

啓南陽世作盟主故周室之不壞繫二國之是賴今君
丕稱顯德明保朕躬奉答天命導揚弘烈綏寧九域莫
不率俾功高伊周而賞卑於齊晉朕甚恧焉朕以眇眇
之身託於兆民之上永思厥艱若涉泉水非君攸濟朕
無任焉今以冀州之河東河內魏郡趙國中山常山鉅
鹿安平甘陵平原凡十郡封君為魏國公錫君玄土苴
以白茅爰契爾龜用建冢社昔在周室畢公毛公入為
卿佐周邵師保出為二伯外內之任君實宜之其以丞

相領冀州牧如故又加君九錫其敬聽朕命以君經緯
禮律為民軌儀使安職業無或遷志是用錫君大輅戎
輅各一玄牡二駟君勸分務本稽人昏作粟帛滯積大
業惟興是用錫君充冕之服赤舄副焉君敦尚廉讓俾
民興行少長有禮上下咸和是用錫君軒懸之樂八佾
之舞君宣翼風化爰及四方遠人迴面華夏充實是用
錫朱戶以居君研其明哲思帝所難官才任賢羣善必
舉是用錫君納陛以登君秉國之鈞正色處中纖毫之

惡靡不抑退是用錫君虎賁之士三百人君糾逖天刑
章厥有罪犯闕干紀莫匪誅殛是用錫君斧鉞各一君
龍驤虎視旁眺八維掩討逆節折衝四海是用錫君彤
弓一彤矢百旅弓十盧矢千君以溫恭為基孝友為德
明允篤誠感於朕思是用錫君鉅鬯一鹵圭瓚副焉魏
國宜置丞相以下羣臣百僚皆如漢初諸侯王制徃欽
哉敬服朕命簡卹爾衆時亮庶工用終爾顯德對揚我
高祖之休命六月己巳徙趙王珪為博陵王

十九年春三月癸未改授魏公金璽赤黻遠遊冠夏五月劉備克成都遂有益州諸葛亮為股肱乃峻刑法自君子小人咸懷怨歎法正諫曰昔高祖入關約法三章秦民知德今君假借威力跨有一州初有其國未垂惠撫且客主之義宜相降下願緩刑弛禁以慰其望亮曰君知其一未知其二秦以無道政苛民怨一夫掉臂天下土崩高祖因之以成帝業劉璋闇弱自是已來有累世之恩支柱羈縻示相承奉德政不修威刑不肅寵之

以位位極則賤順之以恩恩竭則慢所以致弊實由此也吾今先威以法法行則知恩限之以爵爵加則知榮恩榮並濟上下有節為治之要於此為著冬十一月丁卯皇后伏氏廢非上意也曹操使人收后后被髮徒跣而出上謂御史大夫郗慮曰郗公天下寧有是乎后見殺之日后父完及宗族死者百有餘人

二十年春正月立皇后曹氏操女也初操以二女為貴人大貴人立為皇后三月曹操征張魯秋七月魯遂降

二十一年春正月己丑封魏公子六人為列侯夏四月甲午進魏公爵為王五月己亥朔日有蝕之

二十二年夏四月命魏王建天子旌旗出警入蹕冬十月命魏王冕有十二旒乘金根車設五時副車是歲大疫

二十三年春正月甲子太醫令吉平少府耿熙等謀誅曹操發覺伏誅三月有星孛于東井

二十四年春三月壬子晦日有蝕之夏五月劉備取漢

中秋八月諸葛亮等上言曰唐堯至聖而四凶在朝周成仁賢而四國作難高后稱制而諸呂竊命孝昭幼冲而上官逆謀皆憑世寵藉履國威權窮凶極亂社稷幾危非大舜周公朱虛博陸則不能擒凶討逆扶危定傾伏惟陛下誕姿聖德統理萬邦而遭家運不造之難董卓首亂蕩覆京畿曹操階禍竊執天衡皇后太子鳩殺見害剥畏天下殘毀民物久令陛下蒙塵幽處人神無位遏絕王命厭昧皇極欲佻神器左將軍領司隸校尉

豫荆益等州牧宜成亭侯備授朝爵秩念在輸力以狗
國難覩其機兆赫然發憤與車騎將軍董承謀共誅操
將安國靜難克寧舊都會承不密令操遊魂遂得長惡
殘泯海內臣等每懼王室大有閭樂之禍小有定安之
變夙夜惴惴戰慄累息昔在虞書敦序九族周監二代
封建同姓詩著其義歷載長久漢興之初割裂疆土尊
王子弟是以卒折諸呂之難而成太宗之基亮等以備
肺腑枝葉宗子蕃翰心存國家念在弭亂自備破收漢

中海內英雄望風螳附而爵號不顯九錫未加非所以
鎮衛社稷光照萬世奉辭在外詔命斷絕昔西河太守
梁統等值漢中興限於河山位同權均不能相率咸推
竇融以為元帥卒立績效推破隗囂今社稷之難甚於
隴蜀操外吞天下內殘羣僚朝廷有蕭牆之危而禦侮
未立可謂寒心臣等輒依舊典立備為漢中王拜大司
馬董齊六軍糾合同盟掃滅凶逆以漢中巴蜀廣漢犍
為為國所置依漢初立諸侯王故典夫權宜之制苟

利國家專之可也然後功成事立臣等退伏矯罪雖死
無恨遂於江陽設壇場御王冠于劉備備上言曰臣以
具臣之才荷上將之任董督三軍奉辭于外不能除寇
靜難以匡王室久使陛下聖教陵遲六合否而不泰惟
憂反側疚如疾首曩者董卓造為亂階自是之後羣凶
縱橫殘剥海內賴陛下聖德威靈人神同應或忠義奮
討或上天降罰暴逆並殪以漸冰消惟獨曹操久未梟
除侵擅國威恣心極亂臣等昔與車騎將軍董承同謀

討操機事不密承見陷害臣播越失據忠義不果遂得
使操窮凶極逆主后戮殺皇子鳩害雖糾合同盟念在奮
力懦弱不武歷年無效常恐殞歿孤負國恩假寐永歎
夕惕若厲今臣羣僚以為昔在虞書敦叙九族庶明厲
翼五帝以來此道不廢周監二代建諸姬姓實賴晉鄭
夾輔之福高祖龍興尊王子弟大啓九國卒斬諸呂以
安太宗今操惡直醜正實繁有徒包藏禍心篡逆已顯
既王室微弱帝族無位斟酌古式依假權宜上臣大司

馬漢中王所獲已過不宜復忝高位以重罪謗羣臣見
逼迫以大義追惟寇賊不梟國難未已宗廟傾危社稷
將墮誠臣深憂碎首之責若應權通變以寧聖主雖越
水火所不敢辭常慮於懷以防後悔輒順衆議拜授印
璽以崇國威仰惟爵高寵厚俯思自效憂深責重驚悸
累息如臨于谷輒將率六軍順時撲討以寧社稷以報
萬分九月丞相掾魏諷謀誅曹操發覺伏誅諷有威名
潛結義士坐死者數十人

二十五年春正月庚子魏王曹操薨謚曰武王壬寅詔
曰魏太子丕昔皇天據乃顯考以翼我皇家遂攘羣兇
戡定九州弘功茂績光于宇宙朕用垂拱三十有餘載
天不憖遺一老永保余一人早世潛神哀悼切傷丕奕
世宣明宜秉文武紹熙前緒今使使持節御史大夫華
歆奉策詔授丕丞相印授魏王璽黻領冀州牧方今外
有遺虜遐夷未賓旗鼓尚在邊境干戈不得韜刃斯乃
播揚洪烈立功垂名之秋也豈得修諒闇之禮究曾閔

之志哉其敬服朕命抑弭憂懷旁祇厥序時亮天工以
稱朕意於戲可不勉乎二月丁未朔日有蝕之冬十月
乙卯詔曰朕在位三十有二載遭天下蕩覆幸賴宗廟
之靈危而復存然瞻仰天文俯察民心炎精之數既終
行運在乎曹氏是以前王既樹神武之績今王又光裕
明德以應其期是歷數昭明亦可知矣夫人之行天下
為公選賢與能故唐堯不私於厥子而名播於無窮朕
羨而慕之今其追踵堯典禪位于魏王乃告宗廟使御

史大夫張音奉皇帝璽綬禪位于魏王曰咨爾魏王昔者帝堯禪位于虞舜舜亦以命禹天命不于常惟歸有德漢道陵遲世失其序降及朕躬大亂滋昏羣凶肆逆宇宙傾覆賴武王拯茲難于四方惟清區夏以綏我宗廟豈余一人獲乂俾九服實受其賜今王欽承前緒光于乃德恢文武之大業昭爾考之弘烈皇天降瑞人神告徵誕惟亮采師錫朕命僉曰爾禮度克協于虞舜用率我唐典敬遜爾位於戲天之歷數在爾躬允執其中

天祿永終君其祇奉大化饗茲萬國以肅天道庚午魏王即皇帝位改年曰黃初魏帝既受禪問尚書陳羣曰朕應天順民卿等以為何如羣對曰臣與華歆俱事漢朝雖欣聖化義形于色

袁宏曰夫君位萬物之所重王道之至公所重在德則弘濟於仁義至公無私故變通極於代謝是以古之聖人知治亂盛衰有時而然也故大建名教以統羣生本諸天人而深其關鍵以德相傳則禪讓之道也暴極則

變變則革代之義也廢興取與各有其會因時觀民理盡而動然後可以經綸丕業弘貫千載是以有德之興靡不由之百姓與能人鬼同謀屬于蒼生之類未有不蒙其澤者也其政化遺惠施及子孫微而復隆替而復興豈無僻王賴前哲以免及其亡也刑罰淫濫民不堪命匹夫匹婦莫不憔悴於虐政忠義之徒無由自效其誠故天下囂然新主之望由茲而言君理既盡雖庸夫得自絕於桀紂暴虐未極徒於文王不得擬議於南面

其理然也漢自桓靈君道陵遲朝綱雖替虐不及民雖
宦豎乘間竊弄權柄然人君威尊未有大去王室世之
忠賢皆有寧本之心若誅而正之使各率職則二祖文
章之業復陳乎目前雖曰微弱亦可輔之時獻帝幼沖
少遭凶亂流離播越罪不由己故老後生未有過也其
上者悲而思之人懷匡復之志故助漢者協從背劉者
衆乖此蓋民未忘義異乎秦漢之勢魏之討亂實因斯
資旌旗所指則以伐罪為名爵賞所加則以輔順為首

然則劉氏之德未泯忠義之徒未盡何言其亡也漢苟未亡則魏不可取今以不可取之實而冒揖讓之名因輔弼之功而當代德之號欲比德堯舜豈不誣哉初魏王欲以楊彪為太尉彪辭曰嘗已為漢三公遭世衰亂不能立尺寸之益若復為魏氏之臣於義既無所為於國選亦不為榮也遂聽所守及魏受禪乃下詔曰夫先王制几杖之賜所以賓禮黃耆褒崇元老也昔孔光卓茂皆以淑德高年受茲嘉錫公故漢宰臣乃祖已來世

著忠賢公年過七十行不踰矩可謂老成人矣所宜寵異以彰舊德其錫公延年杖及伏几延請之日使杖入侍又使著鹿皮帽冠彪上章固讓不聽年八十四以壽終彪字文先幼習祖考之業以孝義稱自為公輔值王室大亂彪流離播越經歷艱難以身衛主不失中正天下以此重之自震至彪四世宰輔皆以儒素名德相承秉賜雖方節不及震然其恭謹孝友篤誠不忝前列也有子曰修少有俊才而德業之風盡矣至魏初坐事誅

癸酉魏以河內之山陽封漢帝為山陽公行漢正朔焉
明年劉備自立為天子



後漢紀卷三十



覆校官檢討臣李學錦
校對官庶吉士臣裴謙
謄錄監生臣任益春